

東
華
續
錄

東華續錄

咸豐二十二年

臣王先謙敬編

臣陶濬宣恭校

夏四月乙亥朔享太廟○命駐藏幫辦大臣諱齡往奠故後藏

班禪額爾德尼茶酒賞銀五千兩治喪○丙子諭內閣張亮基崇

綸奏剿辦土匪疊獲全勝並委員接辦剿捕事宜一摺湖北崇陽

嘉魚匪徒陳申子等一股自通城何葛墩折回崇陽桂口地方意

欲徑襲崇陽遙爲犄角臬司江忠源於三月十五日馳抵桂口分

隊夾攻陣斬逆首陳申子等殲斃匪黨五百餘名餘匪四散該臬

司復乘勝攻剿通城何葛墩一股於十七日拔營入山該匪何田

俊負隅抗拒復經兵勇殺賊七十餘人將何田俊房屋祠堂一併

焚毀該匪等屢受大創乘勝速剿無難立盡根株見在江忠源已

遵旨赴江南向榮軍營幫辦軍務著卽令署漢陽府知府張汝瀛
前往接辦所有兵勇均由該府調遣以專責成該署督等見復添
派鎮將帶兵分往崇陽蒲圻要隘合力防剿務將各股土匪及未
獲逆首何田俊羅經仁並嘉魚首犯熊開宇等迅速悉數擒獲嚴
行懲辦毋得稍畱餘孽○諭贈太師大學士原任協辦大學士杜
受田靈柩回籍前經降旨派恭親王奕訢前往祖奠日送著沿途
地方官妥爲照料護送茲聞初四日啟程回籍著加恩於到籍後
賜祭一壇派散秩大臣承志前往奠醑以示朕篤念師儒有加無
已至意○諭軍機大臣等前據穆騰額奏班禪額爾德尼涅槃已
降旨照例賞資並加賞物件由驛發去派諄齡前往賜奠其後藏
事務暫令札薩克喇嘛朗結曲丕代辦矣該札薩克喇嘛平日辦
事能否妥協番夷人等是否信服藏務緊要必須素孚眾望者方

能辦理得宜著穆騰額等詳細訪察諄齡見在派往賜奠並可就
近察看該喇嘛朗結曲丕如果辦理一切妥善能愜眾論該大臣
等卽一面奏聞一面傳知該喇嘛卽令其妥爲代辦仍查照例案
奏請給與敕諭見在班禪額爾德尼係在後藏涅槃與前輩班禪
額爾德尼在京涅槃者不同著穆騰額等卽將向來班禪額爾德
尼在藏涅槃後所有派人代辦及所奉 恩旨並 敕諭各事宜
查明成案詳晰開單迅速具奏毋稍疏漏將此由四百里各諭令
知之尋奏扎什倫布案卷因乾隆年間廓爾喀劫掠時遺失據扎
薩克喇嘛朗結曲丕稟稱厯輩經部所載派人代辦未經有 恩
旨並 敕諭各事報聞○以擅行截畱海運漕糧署兩江總督楊
文定前任江蘇布政使聯英布政使倪良燿均降四級調用楊文
定倪良燿暫畱署任○丁丑周天爵奏臣自入合肥境內沿途所

接呈詞土匪搶劫焚燒每鄉不下數百案每案指控數十人其餘
擒匪或千餘人數百人每案訊問皆由正月間省中監犯逸出及
廬州人民因謠言擾亂合肥監犯破獄而出者四五十人知縣吳
祥麟聞謠破膽放出者又五六十人迫監犯全出而土匪愈逞迄
今爲匪首盜魁者皆監犯也臣暫駐紮合肥縣梁園督飭員弁勦
辦各鄉土匪惟臣前募義勇除業經裁汰外存營止五百餘名合
之見帶之兵不過七百餘名實屬不敷布置懇恩截畱陝西官兵
一千名北路過境官兵二千名以資攻剿至梁園西北爲壽定合
肥盜賊叢聚之所臣在此處自無他慮前摺密陳宿遷舉人臧紆
青頗有膽略業經奉諭令其勦賊立功該舉人諒能奮激圖報
上諭軍機大臣等安省情形皆由平日廢弛之故見在各鄉土匪
橫行必得痛加勦洗以靖地方惟該侍郎前募義勇除裁汰外所

存無幾而見在揚州大營兵力尙嫌單薄不能不先其所急所有各路過境官兵均著毋庸截畱卽行咨商李嘉端於安徽省壽春鎮等營官兵就近酌調以資防剿舉人臧紆青前經降旨令其剿賊立功招募壯勇自應給與經費卽著周天爵撥給銀二萬兩飭令樽節覈實支用責成在清江以北剿捕土匪將此由四百里諭令知之○琦善陳金綬勝保奏臣等查賊自被剿後恃有土壘木城堅守不戰每於四路潛出焚掠均被巡邏官兵擒斬奪獲旗幟器械其向七里甸司徒廟窺伺者亦被臣陳金綬臣勝保分派官兵擊斃百餘名至數十名不等餘賊逃入土壘堅匿不出賊巢修築既堅賊礮安設尤密我兵自下攻上甫近賊巢該逆卽然礮抵禦勢難搶入察看賊情其所以時時出巢窺探又不敢對面迎拒者意在引誘官兵追近巢穴彼可然放大礮中其奸計臣等再四

籌商惟有設間解散脅從用奇攻破賊壘方爲計出萬全且近日賊將揚州城外關廂之民房概行燒毀訊之逃出難民僉稱賊計在死守又探聞儀徵江岸停泊賊船百餘隻在彼造具器械意欲由儀徵趨劉家集鈔出臣陳金綬等營盤之後當遣弁兵前往埋伏待其前來截殺不使得逞惟埋伏不能常設而陳家集劉家集兩處要隘必須駐兵臣琦善所帶之兵止有四千臣陳金綬臣勝保亦止四千五百名卽灣頭高廟一路僅有壯勇亦須添兵前次蒙恩飭撥由襄陽撤回歸臣等調遣之大名宜昌鄖陽雲南官兵三千四百餘名及副將錫普常阿參將張守仁管帶之陝甘官兵一千七百名屢經臣等咨催湖北江蘇各督撫均無回覆不知前項官兵見在何往抑經他處截畱因查吉林官兵見到六合者一千名在後各起計亦相距不遠臣琦善已將吉林官兵先撥二百

五十名令副都統銜開隆阿帶赴臣等營盤又於浦口防堵之黑龍江官兵內籌撥四百名令侍衛德興阿暨城守尉哲克東額管帶一同前來以助攻剿至黑龍江吉林官兵應用戰箭亦飛咨臣河臣及安徽撫臣先將各標營存箭趕緊撥解其西安兩營馬隊官兵頭起於二十三日行抵滁州二三起亦接續前進臣琦善已飛檄嚴催派令前赴儀徵縣駐紮防堵並飭該縣將存漕及常平倉穀碾礱就近接濟上諭據稱賊情詭譎既堅守不敢迎拒又時出窺探引誘我兵且探聞江岸賊船欲由儀徵趨劉家集鈔出軍營之後鬼蜮伎倆不可不防著卽妥籌布置如能設法火攻繼以陸路官兵進剿當可得手該大臣等謀勇兼施諒不使賊匪久踞孤城耗我兵力也○以文惠爲內閣學士由內閣侍讀學士是○以揚州府城被賊竄陷革知縣陸武曾巡檢陳暎職與已革知府張廷

瑞知縣梁園棣均逮問命已革前任兩淮鹽運使但明倫戴罪自效隨同楊以增辦理防堵○戊寅諭內閣勞崇光奏軍營病故人員懇請展限給與勘合等語廣西軍興以來在事文武在營病故者前後數十員該員等多係由他省調到迫飭傳親屬扶柩回籍已在一年以外例不准給與勘合惟念該故員等沒於王事竟至旅櫬無歸情殊可憫著准其展限一年凡在二年以內者一體給與勘合以示矜恤○己卯諭軍機大臣等寄諭欽差大臣都統銜琦善等本日據周天爵呂賢基李嘉端奏江北等處爲豫東各省門戶應厚集兵力防賊北竄一摺據稱由江甯入皖滁州爲必經要路非有精兵難資堵禦其次則盱眙鳳陽可以渡淮而北和州裕溪口可以渡江而北均應分駐重兵等語前因揚州大營攻剿喫緊之際難以分兵諭令周天爵於安徽壽春鎮等營官兵就近

酌調以資防剿茲據奏稱安徽撫標及壽春鎮二處兵丁或因省城陷後潰散或屢經調往他省見存不過數百名除前截留山東兵四百名外其餘無可調遣所奏自係實在情形已諭知該侍郎等准其於陝甘邊境官兵酌量截留矣見在賊匪被創情急儼由上游江口北竄不惟皖省滁州一帶空虛可慮卽下游防兵亦恐被其牽掣且金陵賊匪探知我兵均赴揚州一帶難保不乘虛由浦口等處陸路北竄所有吉林黑龍江馬隊官兵經該大臣等派令駐守要隘務當加意嚴防與向榮南岸聲息相通切不可稍涉大意仍一面設法克復揚州慧成見亦趕到卽可合力攻剿斷勿遷延並著與周天爵等緩急兼顧毋誤事機將此由六百里各諭令知之○諭周天爵呂賢基李嘉端奏江北等處應駐重兵以期控馭等語前命舒興阿等調陝甘官兵四千名赴山東交李德軍

營差遣此項官兵計尙在途如滁鳳一帶急需兵力著准其酌量
截留安徽交周天爵等相機剿賊本日復諭慧成如陝甘官兵未
能齊集卽由慧成所帶各兵內酌量派撥安徽應用矣周天爵見
辦土匪務期剿除淨盡令該逆無從勾結竄入並將前拏奸細供
出黨與設法偵獲懲辦至呂賢基奏宿州一帶圍練事宜已有規
模請往廬鳳各屬巡查並飭袁甲三趙昀分赴鳳陽安慶督辦團
練均著照所議辦理再據奏稱安徽撫標兵因省城陷後潰散無
存此項兵丁卽著李嘉端趕緊募充足數認真訓練以備防剿毋
令額缺久懸將此由六百里諭令知之○四川按察使文煜奏報
到任日期得旨事事宜嚴不容稍寬火烈民畏所全者多誠至理
也非嚴無以挽積習非先正不能嚴○庚辰諭軍機大臣等本日
據文瑞奏入春以來風霾屢作日色無光本月初四日午刻日旁

忽見黑氣四圍摩盪形成圓暈兼以煙翳溟濛等語覽奏曷勝儆
惕上蒼示儆變不虛生值此賊匪肆擾徵調頻仍朕反躬自責
亦非語言所能喻著載銓詳考欽天監占驗等書悉心推測據實
具奏不可稍有隱飾原摺著鈔給閱看將此諭令知之○調盛京
兵一千名黑龍江兵二千名往江南剿賊○辛巳以南郊齋宿
頒 硃筆省咎報 天恩諭曰朕以薄德敬承 考命撫育萬方
兢兢業業已三年矣深慚治理乖方愆尤叢集溯自道光三十年
秋逆醜跳梁徵調頻仍迄無成效將士疲於甲冑黔黎苦於差徭
自粵而楚自楚而江妖氛狂悖可謂極矣君人者代 天司牧斯
民當今之時司牧者何事而吾民塗炭未復予一人孤 恩咎重
夫復何辭因思空言無補時值多艱朕惟有虔籲 昊天速消民
劫期與軍營諸將士共奮安民之志羣興鼓舞之懷埽蕩此賊以

蘇民困此朕之初志報 天恩卽符 考願也憶自庚戌冬至親承 大祀已經九次每逢詣 壇齋宿無不思逆賊未平倍覺愧悚茲於本月初七日又值 雩祭前期因誌吾之過以自儆焉宣布中外咸使聞知特諭○諭內閣楊殿邦奏連獲勝仗攻奪土城賊勢窮蹙一摺該逆於揚州城外添築土城徧設阮阱堅拒我師希圖竄踞見經疊次痛剿平毀土城琦善陳金綬勝保等督率帶兵各員正當乘此聲威激揚士氣克復郡城嚴防竄逸見在慧成統帶各路重兵計亦趕到著卽合力進攻肅清江北拯我羣黎朕日盼捷音之踵至也○安徽巡撫李嘉端奏 臣於三月二十五日行抵廬州疊次接受呈詞均係控告劫擄之案復據各屬申報匪徒嘯聚少者數百人多者數千人一在亳州一在謝家大戶見在壽春鎮 臣玉山帶兵二百名先往潁毫剿捕 臣已飛咨河南巡撫

協力兜擒臣周天爵督率兵勇先攻謝家大戶卽赴潁毫力勦其餘羣盜如毛處處告急而粵匪近在江甯揚州被勦勢窮難保不肆行奔竄尤宜扼要防守以免疏虞安徽一省兵額本不甚多加以調遣潰散之餘兵力益形單弱廬州城內見存兵五千餘名其募勇千餘名未經訓練器械不齊難期得力惟有籌畫餉需添練勁兵藉資防勦報聞○壬午常雩祀天於圓丘○琦善陳金綬勝保奏臣等自獲勝後復於三月二十九日夜分西北兩路進攻臣琦善密令總兵雙來等整備隊伍由象鼻橋偃旗息鼓潛攻揚城北面賊壘臣陳金綬臣勝保派參將鞠殿華等於三十日丑刻分三路銜枚疾走並令隨營當差之鹽知事王中孚乘夜督帶鄉夫用木石暗搭浮橋以備渡河臣陳金綬先於司徒廟南直至賊營沿河及大路東西林深草茂處所節節設伏以防賊竄臣勝

保親督兵勇由都天廟前直撲鎮海寺南賊營出其不意圍攻西門外三座土城奮力撲入參將鞠殿華及火器營弁與川勇鍾玉龍等奮勇先登兵勇一擁而進賊眾不能抵禦殺死長髮賊匪甚多生擒二十餘名並槍斃大頭目二名賊眾紛紛竄出列隊相抵我兵槍礮齊施復傷斃賊匪二百餘名並放火箭火罐將賊營焚燒將賊築礮臺拆毀奪獲大礮二位逆賊復由城內調來數千人鈔我兵後臣勝保趕調都司王巨孝等由東路攻擊遊擊魁霖由七里甸繞至賊營西路攻打賊匪死力抵抗我兵不避鋒刃三面齊進槍礮環擊傷斃賊匪千餘並令守備馬國陞將調到一千斤大礮向西門賊營連放數十傷賊甚眾將逆賊土城哨樓轟毀賊首騎馬率眾南走我兵向前追擊賊匪大敗紛紛奔入城中閉門堅匿復由北門賊營閃出黃旗數十面約眾二千餘人紛撲而來

臣琦善卽派參將李志和等由平山堂前往接應臣勝保復督令官兵乘勝合攻賊勢不支潰圍而出俱被斬擒將五鼎橋逆匪所築礮臺拆毀卽派已革參將張文照帶領正定兵五百名就近紮營控制西面要路臣陳金綬見賊已披靡卽乘勝督帶後路將弁兵丁奮勇前進直撲廿四橋一帶賊營三座同時焚毀復殺賊數百名生擒十三名其北門一路經總兵雙來帶同將備直撲賊壘搶上濠牆極力攻打斃賊數百名殺死賊目十數名生擒賊百餘名卽時正法餘眾潰敗遁入木城我兵追殺又砍死紅衣賊目二十餘名匪眾百餘人並將賊營四座同時焚毀臣琦善復派鑾儀使武慶帶領將弁剿殺逃匿餘賊是日自丑至申兩路攻剿大獲勝仗次日黎明又復照前分路攻撲賊營賊見我兵復來向城逃竄兩路追殺復殲斃無數迨追至城下該逆避匿入城城上用槍

敵抵禦我兵勢難搶入隨將所餘營壘盡行燒毀又按獲餘匪數十名此次連日分投攻剿統計斬獲廣西老賊三百餘名湖廣等省賊匪二千餘名撲毀賊營十座臣等會商蔣王廟係揚城赴儀徵總路允應扼要嚴防當經飛飭魁霖等將前駐七里甸之山東官兵一千一百名星夜移赴蔣王廟並由臣琦善添派由浦口調來之侍衛德興阿管帶黑龍江官兵四百名前往督同防堵復派都司文哲琿帶領大名官兵前往接應截賊西竄之路又查灣頭一帶爲東北要隘雖有遊擊馮景尼管帶兵丁二千名在彼紮營尙恐力單又添派由六合調來之副都統銜開隆阿侍衛伊興額管帶吉林官兵二百五十名與都司王永帶領直隸督標弁兵星夜馳往協防扼賊東竄之路初一日據防守高廟之知府福楹稟稱該守亦於是日辰刻見自便宜門起至五臺山賊營火起當卽

乘勢進剿斃賊不少並據都統西凌阿等稱三月二十八日辰刻在浦口巡查適有賊船三百餘隻自南岸江汊順流下駛又江之中流亦有賊船百餘隻連檣而下當經該都統等督率官兵於小塔山東口江面各處整隊堵截賊船於大江中流向北岸施放槍礮經副都統銜魁福帶兵在江岸用檣槍向賊轟擊賊船卽轉舵折回旋經魁福帶同都司富勒登布在江口深密蘆葦之中接獲潛匿賊匪八名旋於初二日接據探報城內賊匪於是日已刻潛由南門竄出欲向儀徵陸路奔逃行近蔣王廟卽被侍衛德興阿等奮力勦截殲斃數十名生擒數名賊匪見有防截之兵仍竄回揚城不敢再出臣等復查揚城向來堅固非多集大礮合力轟擊不能攻破見在雖由三江營調取千餘斤至三四千斤大礮僅據運到四位不敷分路轟擊之用見已派委員弁雇覓人夫飛速挽

運刻下大礮未至賊匪堅匿城中臣等惟有晝則挑兵誘戰夜則分路埋伏俟攻城有具合力轟斃爲一鼓蕩平之計 上諭內閣該逆竄擾揚州多置土壘木城希圖踞守經此次痛加剿洗賊勢已極窮蹙琦善陳金綬勝保調度有方不負委任均堪嘉尚該大臣等仍當督率鎮將激勵兵勇乘勝克復揚城嚴防水陸要隘勿任賊匪竄逸○諭軍機大臣等寄諭欽差大臣向榮等本日據琦善等馳奏連日攻剿大獲勝仗已將揚州城外木城土壘盡行攻破焚毀逆匪遁入城中等語與向榮等前次奏報江甯勝仗奪獲鍾山賊匪遁入城中情形大略相同此次攻剿得手賊匪窮蹙情形已可概見惟該逆詭譎異常潛匿城中難保不陰圖他竄此時北岸陸路攻剿緊急逆匪不敢抗拒恐由瓜口回竄江甯琦善已緘致該大臣加意堵截楊文定統帶艇船在瓜州口一帶務當極

力攻擊遏其回竄之路泰州通州一帶水路俱通揚州亦當一體嚴防無任竄入其江甯賊匪見在困守城中作何舉動又據琦善等奏浦口南岸有賊船三百餘隻順流下駛又中流有賊船百餘隻連樁而下該處官兵雖擊旋即折回此等賊船究竟意欲何往該大臣等務當隨時偵探賊情如有賊匪北竄浦口及竄赴上游之信卽飛咨琦善等及上游安徽江西兩湖各督撫趕緊設法堵禦鎮江爲南北咽喉該大臣等前曾奏明先行收復京口見在作何布置楊文定雇募船隻及麟桂所帶浙江艇船此時諒已到齊著卽與上游所備礮船合力夾擊勿令賊船橫亘江中往來自如其貴神速該大臣等務當乘此聲威四面兜截無使竄逸蔓延將此由六百里諭令知之○諭琦善陳金綬勝保奏痛剿賊匪焚毀賊營一摺逆匪竄踞揚州經該大臣等督率鎮將兵勇分路進攻

賊無算將城外西北一帶賊營土壘木城盡行攻破焚毀賊匪奔潰入城堅匿不出見在籌畫進攻嚴防竄逸所辦均合機宜該逆被剿窮蹙踞城堅守是其慣技若任其喘息久延勢必乘閒衝突又圖他竄該大臣等務當督飭將弁兵勇嚴密堵截屢勝之後萬勿稍涉大意致墮奸計慧成已抵清江續調官兵見到若干著卽知照派撥扼要攻剿調取大礮計日亦可到齊務卽乘機圍攻急圖克復水陸要隘均應豫爲籌備毋稍疏虞儻逆賊被攻潰圍而出或東走泰通下游一帶或回竄金陵或沿江上泝湖北江西等處均不可不豫防著隨時咨會向榮楊文定及上游各省督撫嚴防要路截其紛竄將此由六百里諭令知之○以攻剿揚州賊匪獲勝賞勝保花翎○癸未諭內閣戶部奏請派大員督辦淮北鹽務等語署兩江總督楊文定見在江南辦理軍務新授兩淮鹽

運使崇綸到任尙需時日所有淮北鹽務著漕運總督福濟暫行督辦一切應行事宜著悉心體察權宜辦理務期於鹽課軍務兩有裨益其淮南鹽務著楊文定仍遵前旨迅派道府大員署理毋得以商販梗阻藉詞延誤致干重咎○甲申向榮許乃釗奏臣等因陰雨兼旬道途泥淖城南雨花臺以西陂塘縈繞林木回環該逆依樹臨流結營自衛三月二十九日後天色始霽臣等密派提

臣蘇布通阿總兵馬龍帶領四川兵攻賊營中路總兵秦定三帶領貴州兵攻賊營右路捷勇提標兵勇爲頭敵總兵吉順帶陝甘兵攻賊營左路副將劉開泰帶廣東兵伏中和橋之右革員福興帶廣勇伏中和橋之左以防通濟門內賊匪鈔出我兵之後三十日寅刻蘇布通阿馬龍帶領嚮導渡小橋十餘處紆回曲折始達賊營該逆於營前伐木卧地以當鹿角並又密布竹籤我兵披斬

鹿角拔去竹籤乘天色微明直薄賊壘槍礮齊施出營接仗之賊
盡皆擊斃該逆棄營入林於叢箐中施放槍礮兵勇乘勝進追兩
翼官兵爲水木所阻無路可進不能夾擊惟將附近賊營兩座毀
去燒斃賊匪約數十名斬擒五十名其餘有逃進南門者有難民
乘機逃出者其城內衝出救援之賊當經貴州官兵擊敗臣向榮
親往督陣細察地形一時驟難得手當令整隊撤回至鎮江剿賊
之兵先已調往三千六百餘名所有續撥駐紮無錫浙兵四百五
十名京口駐防滿兵八百名兵力過弱卽廣勇八百名亦復未經
戰陣以之攻剿均恐不能得力臣等又續派雲貴精兵一千五百
名湖南精兵七百名令總兵音德布管帶前往鎮江通共先後派
去之兵約計八百名統歸提臣鄧紹良督率相機進剿以專責成
而圖克復 上諭軍機大臣等自大兵奪取鍾山以後日望捷音

此次進剿經該大臣等密派蘇布通阿等分路攻擊僅將賊營焚毀二座燒斃及斬擒賊匪亦不甚多是剿辦尙不得手昨據琦善等奏將揚州城外賊營木城土壘盡行攻破焚毀賊踞揚城堅匿不出亦與金陵情形大略相同該逆雖屢經懲創南北三城見仍負隅死守江面賊船亦尙未能擊斷必當趕緊合力攻剿以期及早克復見在城內難民退出者甚多若能乘其窮蹙渙散之時設法裏應外合尤爲上策見在如何用計如何離間俾內外可以消息相通著向榮許乃釗妥籌迅辦兵貴神速儻稍形遲滯致賊詭計先施或又衝突他竄永安道州前車之鑒不可不防下游戰船已到五十餘隻並有火輪兵船不知閩浙各船續到者仍有若干隻上游虛應翔所帶礮船既不盡堪適用改造大船恐需時日仍須於沿江趕緊雇覓以備上游堵截聞逆匪輜重糧米多在夾河

船內若能設法擊毀奪其所恃勦洗更可得力至鎮江派往各兵先後約八千名兵力已不爲單鄧紹良督率進剿如能水陸夾攻先克復鎮江一城斷賊江路則金陵揚州勢如破竹我軍屢勝之後乘此聲威自不難一鼓殲除惟當加倍慎重計出萬全切勿大意○乙酉諭內閣周天爵奏參府縣貪劣一摺安徽合肥縣知縣吳祥麟擅放監獄捏報練勇侵吞捐項勒索鄉民種種不法劣蹟昭著該員前據李嘉端奏參革職不足蔽辜著卽拏問廬州府知府胡元燁近在同城毫無覺察顯係有心徇庇又有被控得受典鋪規禮之事胡元燁著卽革職拏問與吳祥麟一併交周天爵呂賢基研訊確情按律定擬具奏李嘉端於周天爵具稟參奏何以不肯會銜著卽明白回奏○楊文定奏本月初二日東風大作總兵和春葉常春督同副將李德麟等傳知各船刻卽起碇連檣直

上駛至焦山口遙望江面賊船各艇船趕緊跟追賊船數隻落後忙跳小船逃遁各艇船當將賊船燒毀隨由甘露寺至大馬頭一帶見沿江泊有賊船二百餘隻江岸設有大礮該逆水陸開礮拒敵各艇船亦開礮轟擊直衝至瓜州口見賊船林立約計七八百隻沿岸賊兵排列齊開大礮各水勇駕駛艇船縱橫衝突回環轟擊燒毀賊船二十一隻擊壞數十隻傷斃賊匪無數生擒四名見查鎮江賊船無多惟艇勇止能於江面攻擊不能登岸若沿岸有兵夾擊便賊水陸不能兼顧可期克復鎮江查是日提臣鄧紹良尙以陸路兵單者請向榮添兵未到未能並進當俟日內陸路兵集再行會合夾攻力圖克復上諭軍機大臣等鎮江賊船無多逆匪多在陸路必須岸上有重兵夾擊方能得手昨據向榮等奏於四月初一日續派雲貴兵一千五百名湖南兵七百名令總兵

音德布管帶前往鎮江此時諒均趕到派往之兵先後共有八千
名兵力已不爲單各路艇船計均先後可到水師兵力亦厚著向
榮卽飭令鄧紹良與和春等統帶水陸各兵約期會合夾攻先將
鎮江一城趕緊收復並將瓜州口一帶賊船設法盡行擊毀以通
南北往來之路江面旣清則賊匪應援路絕金陵揚州之賊自可
坐困務當趁此聲威剋日進兵萬勿稍事遷延致有貽誤○周天
爵奏梁園西北七十里有謝家大戶族中不下千餘戶聚集匪人
招納亡命聯絡十餘村莊以謝四老虎爲首搶劫焚殺之案不可
勝數臣至梁園於四月初一日分哨往捕該匪已逃散一空正在
詳探蹤迹突於初二日有大夥捻匪陳學會紀黑壯等招納賊黨
數十股至四千餘人之多屯聚阜陽蒙城亳州交界之王市集官
軍節次接仗兵勇陣亡二百餘人並有舉人朱鳳鳴等數十人赴

轅告急

臣

卽屬編修李鴻章嚴督附近團練堵禦並咨撫

臣李嘉

端實力勦辦

臣

前赴宿州與呂賢基籌畫機宜後卽馳赴王市集

相機會剿

上諭皖省土匪橫行雖經屢次痛剿尙未肅清若不

掃數殲除必致蔓延貽患見在周天爵計已由宿州馳赴王市集
務卽督飭兵勇將潁州府各屬土匪勦除淨盡以靖地方其謝四
老虎一股仍著李嘉端嚴飭該地方官督率兵勇團練迅速掩捕
協力兜拏毋許漏網○諭前因軍餉浩繁不能不借資民力疊經
降旨令各省督撫妥爲勸諭捐輸復允大學士等所請推廣中額
學額鼓勵人材以昭獎勸諒已刊布謄黃徧行曉諭矣茲據惠親
王恭親王奕訢定郡王載銓奏稱各省富庶之區以廣東山西爲
最若勸捐得人示以破格之賞自能有濟於事等語朕思軍興三
載徵調頻仍凡被賊蹂躪地方及官兵經過處所賑撫供億類皆

民力是資卽廣東山西等省素稱殷實近時踊躍輸將爲數亦復不少若非值此萬不得已之時豈忍重累吾民惟念賊匪自粵而楚擾及江省見在大兵雲集水陸進剿若軍餉稍有不濟致令逆賊南北奔竄卽完善之區亦難自固著葉名琛柏貴哈芬遴選各該省曾任京外各官公正鄉紳人望素孚者傳旨飭令勸諭紳士商民人等竭力輸將隨時奏請優獎仍各就該省所捐總數及各州縣捐數加廣中額學額如該省富家大族有能捐貲至百萬或數十萬者卽賞加五等封爵其次賞加輕車都尉等官並准予以襲次俾民間咸知捐貲助餉卽與效力行閒無異如殷實之戶力能多捐不願榮身者卽明白曉諭給予藩司印照填寫借用銀數俟軍務告竣卽行如數發還仍先行酌請優獎惟須善爲開導剋期集事俾軍餉源源接濟大功迅速告蒞朕所以諭令選用公正

紳士者爲其宣揚上意通達下情俾蠹吏無從侵漁商民不至擾累該督撫其善體朕意妥速遵行原摺著節鈔閱看將此由四百里各諭令知之○丙戌諭內閣侍郎羅惇衍奏風聞江蘇之清河宿遷邳州山東之滕縣魚臺嘉祥等處民多餓殍屍骸遍野請置義冢埋葬等語上年豐工未經合龍山東江蘇交界處所民多流離節經降旨截畱漕米分別賑濟復令各該督撫妥爲撫恤以紓民困茲覽該侍郎所奏情形實堪憫惻著東南兩河總督江蘇山東巡撫分飭各該地方官督同紳士耆老廣置義冢將屍骸埋殮其未經復業居民著仍遵前旨設法安撫毋使失所至被賊滋擾地方慘遭屠戮並著該督撫飭屬掩埋毋令暴露用副朕惠愛黎元澤及枯骨之至意○諭侍講學士晉康奏請隨同防剿一摺晉

康著與文經隨同慧成辦理防剿事宜其巡查黃河口岸仍著

雷以誠會同楊以增辦理○諭軍機大臣等前據戶部具奏陝西
省勸捐成數業經給予獎敘並加廣中額學額用昭激勵矣見在
軍務未竣需餉孔殷昨已諭令廣東山西各督撫遴選公正鄉紳
申諭勸捐因思陝西地方夙稱富庶著舒興阿張祥河遴委陝西
曾任京外各官公正紳耆傳旨飭令勸諭紳士商民人等竭力捐
輸隨時奏請優獎仍就該省所捐總數及各州縣捐數加廣中額
學額如富家巨族有能捐貲至百萬或數十萬者卽賞加五等封
爵其次賞加輕車都尉等官並准予以襲次如有力能多捐不願
榮身者卽明白曉諭給予藩司印照填寫借用銀數俟軍務告蒞
卽行如數發還仍先行酌請優獎務使蠹吏無從侵漁商民不至
擾累該督撫諒能仰體此意妥速遵行也將此由四百里諭令知
之○戶部奏部撥支絀請飭各省於奉撥之款不准率請截留改

撥得旨朕看各該督撫一籌莫展動請部撥有平日漫不經心者有避嫌避怨不肯爲者亦有限於定例格於處分不敢爲者前二條惟在各省大吏激發天良惟末一條則在權宜辦理不可拘執見當緊要之時朕必貸其處分寬其定例求事事有實濟也○丁亥諭內閣順天府奏拏獲行蹤詭秘人犯訊據供稱係湖北宜昌府同知陞任福建延平府知府衍秀於上年武昌城陷後逃出與已革提督博勒恭武係屬嫺親並訊伊僕張連陞該犯是否卽係博勒恭武供稱並不知情等語該犯行蹤詭秘是否假名逃匿抑或另有別情均應徹底根究所有拏獲之自稱在逃職官衍秀及伊僕張連陞著一併交刑部嚴行審訊並著迅傳各該旗佐領族長等赴部識認以憑查辦○己丑諭內閣刑部奏遵旨訊明順天府拏獲假名逃匿官犯實係已革湖北提督博勒恭武供訊明確

並將該革員所遞供詞呈覽一摺博勒恭武係湖北提督大員特派防堵岳州不能固守郡城以致失守罪已難辭乃該革員自岳州潰逃後由湖北穀城改裝易服逃至清江又潛至京外黃村假冒圖脫種種狡詐實出情理之外直至拏獲交部審訊始行具呈曉曉置辯無論一面之詞殊難憑信卽令當時遇賊接仗而於潰散後南北逃避展轉偷生亦屬罪無可逭若不明正典刑何以申明軍律而服人心博勒恭武著卽處斬派刑部尙書周祖培署侍郎培成監視行刑○周天爵呂賢基李嘉端奏據滁州江浦等州縣並署藩司奎綬稟報揚州竄匪有船千餘號自儀徵六合等縣江面竄至浦口初六日有逆船數十隻停泊浦口北岸分路上岸竄擾焚燒營盤及浦口鎮斗岡糴粳營花家營等處房屋人心驚惶等查浦口爲江甯北岸距安徽滁州不及百里由滁州至鳳陽

二百餘里由鳳陽至宿州徐州亦僅二三百里均爲北竄要路且安徽滁州一帶上至安慶廬州下至鳳陽宿州處處有路卽處處宜防前截畱之陝甘兵四千名何時可到殊難豫定卽使先後到齊亦屬不敷分撥浦口防兵本係琦善等布置且揚州距浦口二百餘里勢可兼顧見逆船旣由揚州折回卽揚州自可收復兵力不患單薄應請飭下琦善陳金綬勝保等迅速分兵堵禦北岸俾該逆匪不至乘此空虛狼奔豕突臣等一面飛催截畱官兵來皖俟有成數卽派員帶同前招義勇赴滁州關山一帶堵禦廬鳳宿州等處亦擇要扼其來路仍一面嚴飭各州縣趕辦團練民勇處處防守以壯聲威又奏據署藩司奎綬稟稱逆匪於初八日辰刻自浦口登岸將江浦縣之東葛驛馬搶去前派浦口防守之黑龍江兵因山東兵與賊打仗卽於初七日全數退回滁州見在浦口

實無一兵該署司當將過境之山東兵八百名一面截畱委員管帶馳赴滁州關山一帶堵禦等情臣等思賊匪北竄宿徐是其要路萬一渡黃更難收拾見擬兵勇湊有成數卽先赴固鎮一帶擇要安營闢其渡淮之路惟皖省情形不惟兵無可撥將領亦屬甚少請飭下河南巡撫將畱住永城之兵令原帶之提督善祿酌帶一二千來皖協防至徐州要地應以何路統兵大臣移營駐紮以固藩籬恭候 欽定 上諭軍機大臣等據周天爵等奏揚州逆匪竄至浦口見在浦口實無一兵等語此股逆匪是否係揚州竄出抑係江面船中賊匪分股牽掣所稱黑龍江官兵是否與賊打仗敗退抑見山東兵敗卽行退往滁州黑龍江兵素稱勁旅不應遇賊卽退著琦善等查明確實情形具奏浦口爲江北門戶滁鳳一帶兵力尙單雖前准截畱陝甘官兵四千見在甫入皖境仍恐

一時未能全到此時琦善等想已相機撥兵往剿逆匪避實擣虛是其慣技總須斟酌緩急勿墮賊匪奸計萬不可稍有疏虞致令賊匪北竄將此由六百里加緊諭令知之○諭周天爵等奏揚州逆匪由浦口北岸分三路竄擾請添兵協防等語逆賊避實擣虛是其慣技斷不可令其北竄著陸應穀飛咨提督善祿酌帶永城防兵星赴安徽扼要協同防剿見在續調陝甘兵四千名已由永城行入皖境著卽飛催前進該撫如須出省駐紮亦卽親往調度毋誤事機將此由六百里諭令知之○湖北按察使江忠源奏逆賊滋事以來用兵數年糜餉二千餘萬人無固志地罕堅城巨寇彼猖久稽天討非賊眾而我寡賊強而我弱賊智而我愚也法之不肅謀之不臧貽誤至今宜思變計臣謹將兵事大略有關得失者撮舉八條爲我皇上敬陳之一曰嚴軍法軍興以來法玩

極矣全州以失援陷而赴救不力者相仍道州以棄城陷而望風先逃者接踵馴至岳州豫設防師不能爲旦夕之守九江厚集兵力不能遏水陸之衝文武以避賊爲固然士卒以逃死爲長策皆由畏賊之念重而畏法之念輕耳誠使將士知國典之不可倖逃自不得不併心一力以致死於賊將有致死於賊之心而謀自生士有致死於賊之心而勇自信是所誅戮者不過一二人而所保全者常千萬人也苟欲反怯而爲強莫如易寬而以猛 皇上執法以馭將帥將帥奉法以令偏裨偏裨行法以督士卒遇賊潰走藉詞巧退者有誅臨陣不互相救援者有誅不奉令而遽先撤隊者有誅堵禦不力致賊竄逸者有誅軍律既嚴士氣自奮討賊之效庶可計日而待也一日撤提鎮提鎮而下有副參遊都守千把以次遞相節制而提鎮之位爲最尊位尊則意爲趨避而偏裨不

敢與爭法難驟加而大帥未敢擅決夫人情當齒壯官卑之日每思奮發有爲致身通顯及其身居高位則顧惜之念重而進取之志衰矣且軍營體制副參以下俱聽命於所轄之提鎮提鎮不得其人卽所屬之副參以下均難得力是姑容一二庸妄之提鎮致可用之將弁兵丁同歸無用也又軍興旣久籌餉滋艱提鎮薪水夫饋之需及役使護衛之人均較參遊數倍計裁一提鎮之費養精兵二百而有餘亦何取以有限之餉精養此無益之提鎮哉副參以下資位較輕則奉檄不敢遷延擢拔方始則臨事易爲感奮誠擇提鎮之久厯戎行膽略尙優者以資統御其餘概行撤遣副參以下量才委任務盡其長斯軍政嚴而軍食亦裕儻亦計之最得者與一日汰弁兵選兵之道膽氣第一樸實耐苦次之技藝嫻熟次之巧猾懦怯爲下有武藝而無膽氣臨陣忙亂並其平常演

習之技而亦忘之質實耐苦之人軍令易於服習性情易於調馴
登山涉水不知其勞厯夏經冬不形其瘁故其眾可得而用至於
巧猾懦怯之流既不足以整軍又不足以禦敵徒糜金粟無補絲
毫此兵弁之應汰者一也軍興既久徵調頻煩有從征數年漸形
委頓者老羸充數不堪驅使者是謂疲乏之兵又如曾經戰敗部
曲潰散或遇急卸裝而得生或事後潛逃而就伍苟取充兵萬難
再振是謂殘敗之兵當茲餉運不繼之時豈容若輩更滋虛耗此
兵弁之應汰者又一也誠飭各營於此數者嚴爲淘汰選其膽氣
充壯者爲一等以備攻剿之用其次備守營圍堵之用斯亦當今
之急務矣一曰明賞罰勝有賞而所賞者非真勝不如無賞敗有
罰而所罰者非真敗不如無罰無賞無罰猶冀有賞罰之時賞非
功而罰非罪則人知賞爲主帥私暱之人罰爲主帥傾陷之人懲

勸之用乖怨讎之聲起矣且軍中賞罰非可一概論也戰而勝固當賞然或雜然旅進割取他人所殺之首級以冒功或當追擊至要之時不思乘勢掩殺止願奪取財物以致大勝變爲小勝者又當罰戰而敗固當罰然或奮勇前驅而後援不繼或大眾卻走而一軍獨全者又當賞今則大帥惟據營主之稟報營主又付諸左右之品評功罪之實旣非採訪所能知又因毀譽而多誤求其權衡至當犂然悉合於人心難矣自非親歷行陣開誠心布公道何以慰士卒之懷而振積疲之習乎一曰戒浪戰粵逆頗有盜賊之智臣隨諸軍自粵西至湖南與賊大小百數十戰亦嘗備觀其結營置陣矣賊之結營也因地築壘環以深濠牆厚數尺層開礮眼濠闊數丈密釘竹籤其止也匪黨四出窺吾虛實以廣其謀其行也賊忽候至乘吾倉皇以逞其毒新兵未曾與賊戰者不諳營壘

牆壕之式往往爲賊所乘陝西兵在湖南及湖北江西安徽江南諸軍之失利皆由於賊知結營之利而我不知也賊分數路而我每以一路當之卽或數道並發而臨陣彼此不相顧賊得以施其奇正鈔伏之術廣西湖南諸戰之失利皆由於賊知布陣之訣而我不知也我軍圍賊專以撲營逐利爲事追賊專以跟蹤尾擊爲能小有挫失其氣先餒又須養之經旬始堪一戰逆賊得以長兇鋒我軍終莫操勝算此兵謀不可不豫而浪戰所以宜戒也一日察地勢兵志曰不知地利不可行師地利云者非僅山川一定之險也視賊出入之蹤而先爲之防察賊分合之勢而遙爲之制雖漸車之澮數仞之岡苟形勢在所必爭卽機會不可偶失請以近事明之全州義衣渡之戰賊鋒已挫宜連營河東斷賊右臂道州之役賊勢本孤宜分屯七里橋扼賊東竄長沙之圍賊路俱窮宜

駐兵龍回潭土牆頭堵賊西潰之路他如道州雙牌蓬濤灣六十里之奇險賊入死地而縱之使生湘陰之臨資口岳州之城陵磯皆水陸必爭之隘而放之使遁利害昭然猶堪覆驗此正宜引爲前車之鑒者也一曰嚴約束盜賊之虐民甚矣然有謂盜賊之虐民猶愈於兵勇者盜賊志在擇肥而噬且或一時詐示仁義兵勇則攫取姦汙雖窮苦之家亦鮮得免於是民不怨盜賊而反怨兵勇若不隨時懲以軍法將何以服民心軍中兵勇而外有餘丁有長夫有隨營貿易之人兵丁約束無難鄉勇名隸伍籍有犯尙可按圖而稽惟長夫及隨營買賣之人均游蕩性成不安鄉里甚或偽造兵勇腰牌假其裝束時赴近營各鄉村掠物轉賣肆行無忌此輩久處營中熟視戰鬪之事輕生嗜利習爲固然將來事竣撤退散處民間必多不靖應飭各營於所轄兵勇長夫及買賣人等

嚴明約束遇有干犯除兵勇分別治罪外長夫及買賣人等尤宜從重懲處其有逃匿他方者地方官一體嚴拏懲辦重卽處死斯亦結民心而弭後患之一端也一日寬脅從粵逆起事死黨存者不過數千其餘則新附之匪與裹脅之眾也會匪盜賊與兇惡痞棍粵楚州縣所在有之一旦有警遂爾率其醜類從亂如歸又在配軍流及被賊劫放監禁各犯乘亂得脫爲賊馳驅此皆甘心從逆寬之而無可寬者若良民被賊驅脅本無從逆之情賊匪自武昌下竄時黨眾薙髮潛逃者無數卽其中長髮之賊爲居民懇訴被裹之由往往聲淚俱下可見小民具有天良終非左道所能惑也宜飭各營多寫簡明示諭射入賊中臨陣豎立投誠免死大旗令其乘官軍與賊接仗時棄械奔赴旗下並設一薙髮公局發給免死執照資遣回家散其黨與其於勦賊機宜或亦不爲無補

上諭江忠源奏軍務情形一摺所陳嚴軍法撤提鎮汰弁兵明賞
罰戒復職案地勢嚴約束寬脅從八條朕詳加批覽均屬切中機
宜該臬司親歷行間兩載以來目擊軍情自非空談韜鈴者可比
見已統帶楚勇一千七百餘名前赴江南軍營著卽將所陳各條
與向榮許乃釗等悉心商榷認真辦理江忠源督帶壯勇應於何
處扼要攻剿並著向榮酌量調遣前有人奏所調兵丁多有吸食
鴉片者其輟弱充數恐亦不免著卽隨時查辦認真釐汰將此由
六百里諭令知之○命理藩院尙書恩華赴淮徐防堵賞銀一百
五十兩○庚寅諭內閣張亮基崇綸奏匪徒聚眾抗糧焚署戕官
見在調兵剿辦一摺據稱湖北廣濟縣屬鄉民因該縣知縣蔡潤
琛出示未將應徵各鄉明晰指出以致希圖一律蠲緩聚眾數百
人擁至縣署並分起搶奪經該署督等委署黃州府知府邵綸黃

梅縣知縣鮑開運各帶兵勇馳往查辦業經殲擒多名乃匪黨愈聚愈多闖入縣署以致邵綸鮑開運同時被戕縣署亦被焚毀見在委令臬司江忠源帶兵順道先行剿辦並署提督阿勒經阿挑選精兵帶赴廣濟接辦等語匪徒聚眾戕官實屬罪大惡極卽著阿勒經阿江忠源等督率兵勇迅速剿辦務將倡首之奸棍方四象等悉數擒拏盡法懲治毋令一名漏網江忠源俟剿辦事竣再赴向榮軍營廣濟縣知縣蔡潤琛於應徵應免各鄉未經明晰指出致匪徒有所藉口又復擅離職守藉病逗遛種種昏謬實堪痛憾廣濟縣典史湯朝瓚把總衛廣春於該署府等被戕之時坐視不救蔡潤琛湯朝瓚衛廣春均著革職拏問交張亮基等嚴行審訊按律分別定擬具奏並將署知府邵綸知縣鮑開運被戕情節查明請卹○琦善陳金綬勝保奏臣等陸續由三江營調到大礮

十四位於初四日分運西北兩路對揚城連開數十礮僅擊卸城
垛數座城身未見轟裂又趕造雲梯多架初十日飭令官兵帶赴
西北兩路近城處所該逆先於城上安置滾木擣石灰袋甌塊等
件城垛外面俱密排鋒利鐵釘一見我兵奮勇直前城上已槍礮
齊下不能直抵城根仍卽收隊回營至揚城東路因隔河未能帶
礮前往馮景尼等曾飭壯勇分投攻擊該逆於河邊密插竹籤城
上火彈如雨下不能站立見在負嵎固守者尙有三四萬人城大
兵單圍攻勢有未能且由南門水路至瓜州一帶未能遏賊往來
自南京駛下賊船俱聚泊瓜州江口臣等紮營地面距該處幾及
六十里若分兵前往燒其船隻一日閒斷不能往返臨陣之士亦
難使之晝夜跋涉至浦口六合各被賊擾請兵接應臣等已商撥
兵二千名飭令武慶開隆阿西昌阿伊興額帶領星赴六合浦口

迎擊若六合賊已殲滅卽赴浦口紮營防堵惟臣等所帶之兵僅止六千斷難再行分撥合無仰懇 皇上天恩俯賜添派官兵來揚俾臣等經歷戰陣之兵調防各隘將續到之兵畱營操練使成勁旅刻下軍情無定臣等惟有相機而行設法急攻早圖剿滅琦善又奏查四月初六日午時浦口有賊船數十隻停泊北岸分三路上岸竄擾經山東官兵迎剿於蘆席營接仗因賊匪施放火礮山東官兵人數較少抵敵不住退走斗岡黑龍江馬隊一見山東官兵退去卽將馬隊撤回山後山東官兵雖仍抵禦而逆匪越山過嶺追拒我兵燒毀營盤參將張守仁等帶領兵勇飛往接應趕至浦口西門天已將晚四處火起探悉逆匪已經回船所有我兵守紮何處一時尙難查悉伏查都統西凌阿等均係一二品大員奏明駐防浦口應如何督率官兵嚴密防堵乃該都統等見賊施

放火礮輒卽退走並不竭力抵禦且不在浦口紮營擅駐距浦口
二十餘里之東葛驛沈屬不合該都統等並無隻字呈報其營盤
軍器槍藥馬匹有無遺失亦不得其詳似此趨避畏葸殊堪痛憾
相應請旨將都統西凌阿副都統明慶烏凌額副都統銜總管魁
福等四員摘去頂帶以示懲儆仍嚴飭該都統帶兵一面星速紮
營浦口扼要防範一面查明帶兵官弁嚴行懲辦臣見又飛飭原
派儀徵防堵道經江浦之甘肅參將張守仁將所帶甘肅官兵三
百餘員名暫畱江浦幫同堵禦再據副都統德崇額等報稱初入
日卯刻賊由浦口直至六合縣境已帶領各隊將賊匪殺死四五百
人燒毀賊船三十餘隻兵丁亦有受傷輕重不等又另稱賊匪
甚多兵單力薄恐一時難於取勝城外有運河一道馬隊不能過
河請撥兵接應又據儀徵縣知縣都榮森稟稱初七日申刻探得

有賊船六七百隻由金陵順流而下各色旗幟俱全是否竄入瓜州谷再續探各等語查逆賊之敢於死踞揚城者原恃江甯鎮江之賊源源接應今該逆自因揚州攻剿緊急多添賊船前來救應我兵正宜厚集嚴防而浦口六合被賊分擾又各來乞師查浦口在六合之西由揚州前往浦口須路經六合見在浦口賊匪雖已回船而六合有警不能不派撥重兵迅速赴援又奏續據德崇額等呈稱初九日見賊復至當卽督率吉林官兵闖過浮橋使賊首尾不能相接官兵奮勇爭先副都統忠泰侍衛穆克登額亦帶領營總參領督兵接應是日共殺斃賊匪一千餘名生擒二百餘名焚毀賊船八十餘隻又據江浦縣知縣曾勉禮稟稱初九日有賊匪三四千人由浦口北竄直往滁州各等情適委參領福拉登布等來營面稱賊於初六日竄至浦口西凌阿等帶兵迎敵接仗旋

因賊眾繞至後面夾攻勢不能支兵丁紛紛退避賊眾趁勢追趕
燒毀見帶官兵前來大營呈請嚴處臣詰以軍火器械據稱均已
被焚止贖隨身弓箭馬槍馬匹尙有三百餘匹前以浦口濱臨大
江江面盡係賊船時存窺伺屢飭嚴防該官兵有一千六百名之
多何以任其登岸實屬重負國恩非嚴處所能了事當卽大加申
飭將福拉登布等摘去頂帶並傳令迎告西凌阿等均先摘去頂
帶前往滁州追剿不准來營儻再退避不前定將該都統及官員
等請旨俱行正法臣等見在揚州攻剿雖距浦口較遠然西凌阿
等庸懦退避卽屬臣琦善無能應請旨將臣琦善從重治罪上
諭軍機大臣等揚州城內賊眾負隅固守我兵驟難得手該大臣
等仍當督飭帶兵各員相機進取不可更待添兵致延時日浦口
六合一帶被賊滋擾昨已據周天爵等奏到當諭令該大臣斟酌

緩急撥兵往剿並諭令慧成托明阿等撥兵馳往應援又令周天爵將已入皖境之陝甘兵四千名截留以資防剿本日復諭慧成先其所急堵賊北竄諒俱遵照辦理浦口至滁州一帶爲江北門戶最關緊要該大臣已派撥精兵前往策應並令西凌阿等跟蹤追剿著卽嚴飭該處統兵大員及弁兵等奮勇前進與德崇額等合力夾擊東兵素稱勁旅吉林兵已獲勝何以黑龍江兵並未接仗輒卽退回西凌阿等庸怯無能實堪痛憾比年軍營失事多由紀律不嚴琦善深知其弊必當挽積習以振軍心信賞必罰閫外之權朕斷不爲遙制刻下調兵不爲不多籌餉不爲不鉅帑項支絀情形琦善陳金綬勝保等亦所深悉務當通籌全局迅掃賊氛以慰焦思將此由六百里加緊諭令知之○諭昨因周天爵等奏揚州逆匪竄至浦口等處當經降旨令慧成與托明阿會商迅卽

撥兵援應本日復據琦善等馳奏探有賊匪數千由浦口直竄滁州等語賊匪舍舟登陸分路搶掠意在牽掣我兵見在揚州攻剿正當喫緊之時自未便紛紛抽撥致墮奸計著慧成酌量緩急將見到各路官兵相機調撥尤當迅速援應斷不可稍有延緩致賊北竄蔓延昨據江忠源奏陳軍務八條頗有可採著查照酌覈辦理原摺鈔給閱看將此由六百里諭令知之○以賊竄浦口堵剿不力琦善下部議處革都統西凌阿副都統明慶烏凌額總管魁福職仍畱營○以揚州府城被陷革參將文玉都司宋天麒守備方綱職暨已革鹽運使劉良駒均逮問○辛卯諭軍機大臣等據陳啟邁奏賊匪擾及皖省徐州喫重請調兵扼剿兼衛糧臺一摺賊匪竄及滁州定遠一帶徐州爲北路重地設有三路糧臺關繫緊要本日諭令慧成迅派官兵赴徐州南路扼要堵截並諭令李

德於過境官兵僅令前進應援陳啟邁等辦理糧臺務須嚴加防範所有糧米軍火器械尤應察看情形緩急隨時擇地安頓前據慧成奏移糧臺於宿遷是否業經移設賊蹤靡定總當相機保衛不可稍有疏虞至往來文報或有阻隔卽行設法繞道行走勿致遲誤將此由六百里傳諭知之○諭昨據琦善等奏賊竄滁州當降旨令慧成將見到各路官兵迅速應援本日據陳啟邁奏徐州情形喫重請調重兵扼剿等語見在大營糧餉軍火萃集徐州防護必須兵力慧成接奉前旨諒已派撥應援仍將見到各路官兵酌畱徐州一帶以資防堵而護糧儲前據奏請移糧臺於宿遷是否業經移設總宜隨時察看情形妥慎辦理將此由六百里諭令知之○壬辰琦善奏據六合縣知縣溫紹原稟稱賊匪竄至浦口以後初八日燒毀江浦縣之東葛驛卽抵滁州旋被攻陷安徽撫

臣李嘉端見駐廬州府周天爵呂賢基均在宿州一帶諒可就近迎擊並有臣飭令帶領黑龍江原隊官兵之西凌阿等折回滁州一帶追剿如果前後夾攻該匪自腹背受敵查滁州路通四處由舒城桐城潛山太湖英山應山等縣可至河南信陽州由舒城六安可至河南光山固始等縣由滁州定遠鳳陽靈璧宿州可至河南永城縣由滁州來安天長盱眙五河卽至淮安府之桃源縣無須經過清江浦以上各路信陽光固較遠永城次之惟桃源一路逼近黃河計程三站卽與東境毗連路近則籌防宜速臣琦善見在確探賊蹤是否踞守滁州或向何處分竄擬卽督率原帶陝甘直隸督標官兵探明賊蹤所在超越賊前迎頭截剿惟刻下揚州正在攻剿喫緊之際臣與陳金綬勝保所帶官兵共止數千若遽分兵前往又恐該逆乘我兵單出巢抵敵難期制勝惟有仰懇飭

催慧成就近督帶官兵星夜來揚與陳金綬勝保會同接辦攻剿
事宜俾臣得以親督官兵星速馳往查探迎剿又奏臣查大股匪
眾盤踞江甯鎮江揚州三城恃爲犄角臣與向榮分攻江甯揚州
南北之軍皆在陸路聲勢既難聯絡其水路艇船又遠在鎮江見
在江甯揚州擊敗之賊往來江中無所阻攔且浦口六合儀徵等
處隨在皆可登岸賊若由江甯而至鎮江計程尙隔一百八十餘
里若到浦口六合等處則對江徑渡一水相通況鎮江續調上海
艇船一經到齊闌截大江則逆蹤不能南竄勢必羣趨北岸東路
淮徐距賊尙遠已蒙簡派重臣分兵扼守獨與賊對渡之浦口六
合儀徵防兵甚單且有馬隊無步隊不能收相輔而行之益爲今
之計與其分兵遠防莫若合兵迎剿可以速掃妖氛刻下滁州失
陷凡續調之兵路經安徽不能不截畱堵禦縱有多兵亦無由直

到江北設逆賊狡焉思逞浦口六合儀徵兵力單薄深恐寡不敵眾惟有仰懇 天恩迅速添派北路綠營官兵兼程前赴浦口六合儀徵使逆賊知我有備不敢萌北竄之心則他路庶可調度周天爵呂賢基奏據鳳陽靈璧等縣及宿州探報逆匪於初九日竄入滁州經藩司奎綬札委知府裕恭等前赴關山一帶防剿初十日該匪已竄過關山至定遠所屬之池河驛旋又北竄總鋪直撲鳳陽所屬之臨淮關將濠梁驛號舍燒毀查臨淮關爲渡淮要路飛札該署司等相機撤去浮橋將船隻藏於北岸各河港內以遏奔軼惟沿淮南北兩岸處處可渡急宜乘機堵禦擬將宿州見存兵勇由 臣 周天爵統領在宿州城東要路酌量前進並號召宿州團練鄉勇分路截殺仰懇 天恩飭催李德慧成等各將所帶大兵擇其行走在前去皖較近者速令赴皖聽候調遣見在驛路梗

阻惟自揚州大營速發勁兵直取滁州以中斷逆匪之勢使該逆前後不能相顧然後大兵渡淮進援鳳陽斯逆黨可期蕩平上諭軍機大臣等琦善奏滁州失守請帶兵徑赴桃源永城一帶探明迎剿復據周天爵呂賢基奏逆匪直徧鳳陽請發揚州勁兵直取滁州以斷賊勢各一摺覽奏彌深憤懣江甯揚州屢獲勝仗該逆堅守不出見在陸路北竄之賊未必非其分股以圖牽掣我師該大臣擬赴桃源永城一帶繞出賊前迎頭截擊恐道路較迂兵機較緩且統帥遠離大營則揚州聲威不壯又恐墮賊奸計慧成托明阿奕經等見已先後馳抵清江浦北路重兵計已陸續趕到朕思卽派托明阿統帶見到之兵疾趨皖省並飛催在途之兵迅速前進擇要迎剿計周天爵所帶義勇與續到陝甘官兵亦可彙齊夾擊其滁州以南係賊來路卽爲揚州大軍後路若我以勁兵

由六合江浦直擣滁州衝斷賊勢使賊腹背受敵與北路迎擊之
兵前後夾攻當可得手該大臣前奏已派武慶開隆阿等帶領精
兵二千前往擊賊又有德崇額等所帶吉林馬隊與西凌阿等退
回東葛之黑龍江馬隊均扼江北要隘應如何督催進剿可否於
陳金綬勝保二人中酌派一人前往統帶軍情緩急殊難遙度琦
善係欽差大臣值此賊蹤靡定惟當統籌全局相機迅爲布置萬
勿令賊北竄卽慧成所帶各兵該大臣亦可調遣總期於事有濟
方爲不負委任將此由六百里加緊諭令知之○諭本日據琦善
奏滁州失守復據周天爵呂賢基奏逆匪竄徧鳳陽各一摺該匪
自浦口北竄攻陷滁州旋撲鳳陽之臨淮關將濠梁驛號舍燒毀
雖經過境之山東兵及該署府裕恭知縣黃元吉等接仗殺賊數
十人而賊勢猖獗到處擄掠已有旨令托明阿星速前進並諭琦

善酌派大員分撥精兵前往滁州夾擊矣賊匪大股盤踞金陵及鎮江揚州三城而以分股牽掣我兵自應及早殲除周天爵呂賢基見將宿州兵勇並西安先到之兵酌帶前進本日復諭令慧成托明阿等迅速撥北路續到精兵卽由托明阿統帶馳往會剿著周天爵等督率將弁探明賊蹤相機截擊皖省土匪尙未掃除淨盡斷不可令其勾結致剿辦更難得手其分竄賊匪究係從何路竄出約有若干人是否占踞滁州其失事情形官員下落著周天爵呂賢基李嘉端等詳查具奏至文報糧餉道路尤關緊要如有阻隔卽設法繞道行走不可有誤將此由六百里加緊各諭令知之○諭據琦善奏滁州於四月初九日失守又據周天爵等奏逆匪於十一日直撲臨淮關各等語永城縣爲由皖入豫緊要門戶提督善祿是否已帶兵趕赴安徽協同防剿陸應穀著卽出省迅

往永城一帶扼要駐紮所需官兵應如何就近調撥之處務須權其緩急嚴密防堵切勿令賊匪闖入其光山固始信陽等州縣著一體偵察毋稍大意前調赴山東之陝甘兵四千名已據周天爵等奏准截畱見在西安官兵抵宿者僅五百名著該撫飛催後起過境官兵星速前進毋得稍遲將此由六百里加緊諭令知之○諭雷以誠晉康楊以增奏請酌添渡口以便居民一摺黃河上下渡口前經楊以增奏歸併八處實力巡查茲據雷以誠等奏稱歸併渡口太遠居民買食維艱並以雜糧商船民食倚賴請添設渡口變通辦理等語著照所請准其於清華觀及雙溝洋河阜河等鎮酌添渡口四處每處以渡船五隻爲額仍照原奏章程由官編號給票派撥弁兵專駐盤查其河南雜糧商船在徐城南岸起卸亦照所擬辦理惟於各商船到時卽令驗票趕卸迅速挽回北岸

毋得託故逗遛此係爲體恤民隱起見仍當酌量緩急一律嚴密
巡查毋稍疏懈將此由六百里各諭令知之○以李鈞爲內閣學
士

由太常寺卿遷

○癸巳諭軍機大臣等戶部奏變通新疆兵制一摺據
稱新疆南北兩路駐兵四萬餘名歲需經費一百四五十萬兩其
換防官兵俸賞行裝鹽糧等項取給於內地者亦復不貲見值軍
興數載議款維艱擬請將陝甘兩省調往口外換防官兵自本年
爲始概行停止其喀什噶爾英吉沙爾葉爾羌和闐烏什阿克蘇
庫車喀喇沙爾入城應設防兵卽由伊犁烏魯木齊綠營內如數
酌撥如額不敷抽換准其於滿洲營官兵內通融調撥一律定
爲五年更換等語新疆兵餉爲數最多見當庫款支絀之時若不
亟思變通此後愈難爲繼著陝甘總督伊犁將軍參贊大臣烏魯
木齊都統葉爾羌參贊大臣按照所奏通盤籌畫如果事屬可行

卽酌議章程迅速奏明辦理該督等務當公同商榷於節省經費之中仍寓相爲維制之意不得以窒礙難行一奏塞責至所稱擬以土爾扈特兵換防之處此項人等能否與回疆相安有無窒礙仍須斟酌又片奏豫籌經費並酌擬款目十條均有實際著該督等體察見在情形覈定章程迅速具奏辦理毋得因彼此會商以致遷延時日也原摺片單均著鈔給閱看將此各諭令知之○甲午諭內閣見在揚州賊匪業經大兵圍困勢已窮蹙其分股竄擾滁州一帶復派北路重兵前往攻剿惟統兵多係一二品大員必須事權歸一以專責成琦善係欽差大臣所有江北各路官兵著統歸節制悉聽調遣該大臣其通籌全局迅掃賊氛毋負委任○諭前有旨令楊文定在江甯辦理防堵迨陸建瀛自九江退回卽藉詞移往鎮江又不嬰城固守旋至失陷輒復退至江陰因一時

簡用乏人將該員革職暫行署理兩江總督猶冀其戴罪自效稍贖前愆乃數月以來毫無布置實屬大負委用楊文定著卽革職拏問交怡良派員解送刑部治罪○諭德勒克多爾濟等奏哲布尊丹巴呼圖克圖庫倫之署堪布諾們罕伊拉固克散率領呼圖克圖喇嘛等呈捐馬一千匹求爲轉奏請旨一摺該呼圖克圖等聞南省賊匪滋事捐馬一千匹實屬出於誠悃朕心實爲嘉悅惟軍營應需馬匹見已盈餘足敷需用况道路遙遠到彼必致疲乏且見據欽差大臣琦善等奏稱已將逆匪擒斬數千名大兵一到蠢茲小醜必可立即撲滅該呼圖克圖等所捐馬匹著毋庸豫備仍加恩賞給黃哈達一塊白哈達一塊著德勒克多爾濟等轉行發給用示朕獎勵呼圖克圖至意並著將官兵獲勝之處一併曉諭俾令歡忭○諭德勒克多爾濟等奏喀爾喀土謝圖汗車臣汗

兩部落汗王貝勒貝子公扎薩克台吉等呈請願捐馬二千匹懇
求轉奏請旨一摺土謝圖汗車臣汗等聞南省逆匪滋事公同呈
捐馬二千匹實屬出於誠悃殊堪嘉尚惟軍營應用馬匹見已敷
用著德勒克多爾濟等轉行曉諭伊等所捐馬匹停止豫備以示
朕體恤蒙古臣僕之至意○諭軍機大臣等怡良奏馳抵江蘇省
城暫駐防守一摺本日已明降諭旨將楊文定革任拏問交刑部
擬罪矣怡良職任兩江責無旁貸務當統籌全局專心防剿見擬
暫駐蘇省固可以安民心惟軍情變幻尤須體察何處緊急卽往
策應方爲妥善楊文定所帶師船和春一人能否督率向榮仍派
結實可靠大員前往接替刻下賊由浦口六合竄至滁州明係分
股牽掣我軍急需江面礮船從中橫截使賊首尾不能相應方爲
得手此事最關緊要不知廣東閩浙前調兵船何時趕到殊深焦

灼該大臣等務當悉心籌畫隨時知會江北大營水陸夾攻毋任北竄本日據文藝奏三月三十日帶兵出隊直逼鎮城該逆勢似

退縮不料竟由運河旁寶塔山分股尾兜以致陣亡佐領賡善等十一員兵八十一名明係一大敗仗並不詳細聲敘甚屬含混著向榮怡良許乃釗確切查明據實具奏又何桂清片奏楊殿邦聯英劉良駒胡調元倪良燿鍾殿選畏賊各情著一併確查據實參奏文藝何桂清各摺片均著鈔給閱看將此由六百里加緊各諭令知之○琦善奏臣據來安縣知縣稟稱探得初九日賊由烏衣一帶至滁州南門入城劫擄倉庫搶掠典鋪復由西門出城竄至諸隆橋等語查諸隆橋在滁州之西距州城三十五里東北可至來安天長等縣西南可至廬州府西則直達鳳陽府臨淮關等處路徑分歧在在均通北竄之路六合儀徵濱臨大江浦口更緊對

江甯其六合儀徵又在浦口下游而北岸瓜州與南岸鎮江對峙
所有艇船數本無多停泊焦山是江甯以迄瓜州一百八十餘里
之江面竟無堵截之船此時賊匪固來去自由卽將來鎮江克復
艇船移泊瓜州江面仍無一巡截舟師該逆窮蹙思竄逆流而上
其勢較難獨有對江卽渡浦口六合儀徵等處設不添兵嚴防未
免重南輕北是以臣前有北路添兵之請臣於未派武慶開隆阿
等帶兵馳赴浦口之先曾以北路緊要似須陳金綬勝保二人中
酌量一人前往商之陳金綬勝保據云該提督等係奉旨責成攻
剿揚州逆匪見在勢難兼顧是諸臣各有專司臣不敢不先顧北
路且疊據江浦六合儀徵來安天長等縣紛紛以軍情緊急各請
援兵數千而臣所帶之兵除已分撥各隘外數止三千其調防儀
徵之參將張守仁所帶陝甘兵一千七百餘名除已到三百餘名

暫畱浦口外其餘均在途未到惟有在湖南守城之川勇六百名
尙屬得力飭令縣丞張繼武管帶由水路前來其大名官兵雖已
應調來營而滁州以上地方戒嚴勢不能不聽其截畱堵禦陳金
綬勝保既不能分身前往臣又不能置北路於不顧惟有俟接替
有人卽當親自帶兵馳剿可否仰懇 天恩飭催慧成星速來揚
會同陳金綬勝保接辦攻剿事宜俾臣得分身帶兵馳往探蹤迎
剿並添派綠營官兵星馳前赴浦口六合儀徵一帶防堵庶兵力
厚集面面設防得遏該逆北竄之路 上諭朕思揚州賊匪圍困
不出而以他股由陸路牽掣我軍恐琦善遠離大營致墮奸計是
以特派托明阿就近帶兵與周天爵等迎截北竄之賊復命琦善
等督催西凌阿德崇額武慶等帶兵斷賊後路又慮見在北路續
調重兵統兵多係一二品大員事權不一調遣難資得力本日已

明降諭旨令該大臣節制江北諸軍矣茲復據琦善奏請飭慧成來揚接辦攻剿自請帶兵繞至北路迎擊似與陳金綬勝保商酌意見未合又恐慧成等所帶之兵不能調遣故爲此奏朕昨日見陳金綬勝保未經聯銜已料及此見在賊情詭譎意圖牽掣該大臣等協力同心尙恐不濟豈可稍存意見耶此旨著與陳金綬勝保同閱此時北路萬分緊急無論何人迅卽帶兵迎擊若能擊敗分股賊匪於江南江北大局可冀成功儻稍有疏失貽誤匪細軍情緩急勢難遙度惟望該大臣等善體朕意毋稍拘執也將此由六百里加緊諭令知之○李嘉端奏查賊破滁州後由池河紅心驛徑撲臨淮關經藩司奎綬將調赴揚州之山東兵八百名截畱並委知府裕恭帶領兵勇堵禦並請多調兵勇迅往接應查鳳陽爲南北咽喉設有疏虞河南山東全局震動臣未敢在廬株守亟

應督兵往剿廬州見有民勇四百九十餘名酌選四百名交候補直隸州知州李登洲等作爲前隊又都司海陞管帶壽春兵二百九十餘名親帶前往救援飛咨河南山東江蘇各巡撫及徐州鎮總兵四面兜剿以期一鼓成擒上諭據李嘉端奏稱鳳陽爲南北咽喉情形最要酌帶兵勇親赴救援並飛咨河南山東江蘇各巡撫及徐州鎮等四面兜剿見在事勢急迫各路官兵相距遙遠徵調恐難濟急惟慧成托明阿之兵較近想已遵旨分撥前往著周天爵呂賢基李嘉端會同速籌剿辦其陝甘兵四千名前已行入皖境卽著飛催趕緊到齊以資調遣此時徵兵籌餉均屬要務遠兵遠餉殊難救急惟當就近籌酌移緩就急毋致稍有延誤將此由六百里各諭令知之○李德奏東省門戶必須首扼淮徐所恃者惟黃河天險前將密雲山西陝西等處官兵八千名分布

於王家營各處實力防守原爲援應清江浦而設該處係南北鎖鑰所關甚重昨准琦善咨會前赴安慶已飭遊擊馮化青帶領一千四百餘名回東查此項官兵軍裝器械一切齊備可以就近截留調撥王家營先令該遊擊暫行管帶約計山西陝甘官兵次第可到臣定於四月二十日啟程前赴宿遷於山湖兩路要隘安頓大營後周歷重興集王家營各處按見在官兵實計尙有六千餘名分撥足敷防堵咨俟會商河臣楊以增相度機宜加意防範上諭據奏擬親自帶兵前赴宿遷於山湖兩路擇要防堵所奏尙合機宜著卽權衡緩急相機妥辦如前路緊急自宜派兵進攻而後路空虛亦宜準備不可稍涉大意致誤事機○江蘇學政何桂清奏江蘇巡撫楊文定漕運總督楊殿邦聞警退避情形得旨學政向不與聞地方之事原爲各有責任勿得越俎若確有聞見雖

平時亦應直陳况當軍務倥偬時也汝不必過於拘泥○文藝奏

臣駐紮丹徒鎮隨至丹陽縣地方會齊官兵整齊器械以杜賊匪

下竄之路三月二十九日提臣鄧紹良與臣督兵移於離鎮江十

里之甘棠橋紮營三十日帶領旗綠兵勇二千餘名出隊進至南

城外觀音山一帶逆匪四五千人蠶擁來撲提臣鄧紹良與臣督

率旗綠兵勇迎前放礮轟擊奪黃旗三桿擊斃賊匪二十餘名追

殺賊人不計其數乘勝直逼城下該逆勢似退縮不料竟由運河

旁竄塔山分股斜衝旗營官兵奮勇向前猶復力戰因勢薄卽令

撤隊回營除受傷兵三十一名外陣亡佐領賡善萬清廣慶防禦

雙永圖敏泰椿齡畱貴善成驍騎校恆秀雲騎尉春祥委前鋒校

陞與陣亡兵八十一名見在移營京峴山駐紮水陸併力進剿得

旨此明係攻前遭後被賊兇衝一大敗仗何不詳細聲敘已有旨

將汝發往新疆若奮勇向前奏報皆實不特前罪邀免尙可敘功
若有意飾飾則是一無用之人徒畱無益惟有正法而已○以予
告大學士潘世恩重宴恩榮賞其孫祖同舉人○乙未向榮許乃
釗奏據總兵和春稟稱四月初二日該總兵將艇船揚帆直上行
至焦山口遙見甘露寺至鎮城一帶皆有礮臺臺下停泊大小賊
船約三百餘隻見我師艇船上駛開礮迎拒各水勇亦開礮還擊
當時擊壞賊船數十隻燒毀六七隻陸路之賊隨卽退回鎮城各
艇又駛向江北直趨瓜州岸上逆匪開放大礮連環不絕各師艇
順風衝擊該逆船隻有被艇船撞壞者有被大礮擊破者該逆不
能抵敵敗回江岸登岸之賊亦被船礮擊斃甚多日暮風微始將
各船退回除燒毀擊壞各賊船外生擒賊匪三名殺斃無算此下
游艇船勝仗情形也臣等探聞大兵破雨花臺後賊中設備南門

尤嚴通濟朝陽兩門較疏初六日密派四川兵勇攻通濟門之左
陝甘兵勇攻通濟門之右湖南兵勇由鍾山攻朝陽門之右廣東
兵勇由鍾山攻朝陽門之左貴州廣西雲南兵勇由鍾山直攻朝
陽門之中於初七日五更出隊該逆卽於通濟朝陽二門內各出
二三千人離城數十步而止我五路兵勇分投衝殺直撲賊陣該
逆回奔入營我兵追擊殲斃極多於通濟門外刺死執大黃旗賊
目一名兩城外生擒賊匪共七十餘名隨卽逼近賊營開放槍礮
奮力環攻直薄城闌城上矢石交下城外賊營大礮夾擊官兵暫
退數武謾罵誘敵該逆始終不出臣向榮徧觀鍾山形勢舊時賊
壘離城過近大礮能及我兵不便安營惟右手紫金山麓陂陀之
上居高臨下俯瞰全城其地可以紮營四座因於十一日飭役築
壘護以兵勇該逆恐我軍占據形勝出賊數千前來攻奪當卽揮

兵分投尾鈔該逆遁回追殺長髮賊四十餘人餘皆逃匿入營我兵亦卽撤回此江甯節次攻剿情形也至長江上游據盧應翔等稟稱初十日會同都司楊煥章等選派兵勇分作三路一由雙牯小河水路進一由大江水路進一由雙牯洲陸路進另派奮勇二百五十名各持火器假賊旗幟號衣用小艇沿江北岸潛渡南岸草鞵峽伏蘆洲中十一日子初出隊約定丑刻齊抵信地起火爲號同時舉發盧應翔督帶礮船八隻礮勇四百名從雙牯河直抵螺絲橋繞出夾江楊煥章帶官兵三百五十名沿洲繞岸至夾江於蘆葦中多豎旗幟以爲應援千總黃秉忠督帶礮船十二隻小礮船二十四隻礮勇五百名從大江繞進夾江賊營放礮迎拒楊煥章卽從葦岸接應夾攻將賊營並礮臺望樓一齊蹋毀殺賊十餘名奔潰落水死者無數乘機齊進見城外賊船林立上有礮臺

對我船開礮虛應翔礮船鈔截賊船之後黃秉忠率領各礮船回環衝突施放大礮轟碎賊船二十餘隻並用火桶火罐燒毀賊船一百餘隻賊船始皆潰散其川楚各勇從草莽峽分作數路同時拋擲火器各燒賊船洲上賊匪見各船火起約數百人擁出馳救陳喜率船中礮勇登岸赴援立斃執黃旗賊目一名賊始紛紛潰逃各兵將峽口木簾卽時拆斷救出民船一百三十餘隻此上游礮船勝仗大略情形也查該逆盤踞金陵於城門外窰濠築壘排列大礮爲負固計今我兵已紮營紫金山可以用礮對擊並已行文蘇杭各處調出四五千斤大礮以便安放新營對擊朝陽門外賊營惟是見在兵力戰勝有餘而省城過大圍攻不足非潛通消息運奇設謀一時難以力爭必須見有成效乃可深入 上諭內閣向榮許乃釗奏鎮江江甯水陸攻剿獲勝一摺統計兩城水陸

各路攻剿正在得手之時賊勢定已窮蹙著該大臣迅飭帶兵將
弁乘勝進取務將鎮江江甯兩城剋期攻復毋令江面賊匪更與
北岸聯絡以致蔓延○諭軍機大臣等該逆分踞金陵鎮江爲負
固計和春與各鎮將督率戰船進攻下游擊壞匪船向榮探聞通
濟朝陽兩門賊防甚疏分別五路進擊並奪紫金山築壘安營其
長江上游經盧應翔等分路進攻焚燒賊船連次獲勝卽著該大
臣設計用閒謀定後戰早圖克復朕心實深盼望見在南北兩岸
賊船甚多總須斷其浮橋使不得來往自如以孤其勢則浦口等
處北竄之賊亦不敢深入將此由六百里諭令知之○李嘉端奏
臣於初九日接據探稱浦口有賊船千餘隻停泊江心北竄要道
必須重兵防守臣卽咨周天爵督飭原帶將弁管領畱鎮定遠之
山東等兵趕赴清流關扼要置守又調舒城縣收集之壽春兵二

百六十餘名前來廬郡由

臣

調遣又安省之宿亳係渡黃要道見

值逆匪分股竄擾滁州漸近宿亳較爲喫緊

臣

已分咨河南撫

飭令將原派之弁兵進駐亳州山東撫

臣

將駐紮交界之兵進駐

宿州以防北竄雖該逆大夥尙在江甯而此股業經北竄所關尤

巨况揚州餘賊無多未便顧彼失此

臣

已飛咨琦善分兵由天長

鈔出賊前迎擊並咨向榮分兵應援冀免竄逸惟安危所繫聞不

容髮誠恐該大臣等稍有遲滯必致貽誤事機請旨分飭該大臣

等迅速調撥精兵前來堵剿遏賊北竄要路又奏探聞浦口斗岡

營盤火藥被賊燒毀山東黑龍江官兵退回滁州南關初九日賊

至滁州用礮轟開城門擁入山東黑龍江兵連夜由池河退回紅

心驛等情查紅心驛距臨淮僅六十里滁州北惟清流關可守過

此惟淮河最爲扼要見

臣

周天爵行抵宿州卽趕回堵截恐賊已

過清流不及防禦僅能於河上下紮營鳳陽以南均無重兵各城
練勇亦單一無足恃爲此籲請飭下江西北各督撫就近挑選
精兵數千名趕赴廬州以資救應○上諭前聞賊擾滁州當經諭
令琦善酌派精兵馳往救援又命托明阿就近帶兵徑赴北路與
周天爵等合力迎剿各路官兵早經分撥必可迅抵皖省且截留
陝甘官兵計亦陸續趕到該撫卽與周天爵呂賢基等妥爲布置
勿令賊匪紛竄仍飛催未到各兵以資調遣當此賊蹤靡定惟當
就近籌撥以期有濟毋庸遠調鄰省官兵徒延時日也○諭前因
賊匪攻陷滁州疊經諭令琦善分兵應援本日復據李嘉端奏請
調江西北官兵前往朕思琦善所派援兵暨托明阿周天爵所
帶兵勇計日可到毋庸遠調他省官兵徒稽時日該大臣所派援
兵著令迅速馳往毋稍遲延至黑龍江官兵前在浦口遇賊退回

營盤被燬賊至滁州用礮轟開城門山東黑龍江兵連夜由池河
退回紅心驛黑龍江兵素稱勁旅何至遇賊披靡毫無振作該帶
兵官所司何事著琦善迅卽查明據實具奏○丙申諭軍機大臣
等楊以增奏清江西路添兵嚴防李嘉端奏赴援日期各一摺見
在逆匪盤踞臨淮鳳陽勢甚危急亟宜四面兜剿遏其北竄李嘉
端於十八日帶兵赴援自係刻不容緩惟所帶兵壯僅數百名實
屬單薄卽號召練勇勸借軍餉亦屬緩不濟急該撫旣冒險前進
儻各路竟無接應致令賊勢益張所關非細朕數日以來聞賊由
陸路北竄倍深焦急著周天爵呂賢基迅卽帶領兵勇星速赴援
前准截畱之陝甘兵見在抵皖已有若干名周天爵卽一併統帶
與托明阿善祿李嘉端或合兵進攻或分路兜截當此防剿喫緊
之時赴援應機兵貴神速萬不可稍涉拘執致有延誤至清江西

路亦宜嚴防楊以增所奏水陸防堵情形自爲遏賊分竄起見惟
退守不如進攻楊以增仍當偵探賊情隨時相機進剿以爲我軍
後路聲援若但知株守一隅恐藩籬亦難自固聞李德見已帶兵
前抵宿遷正可與楊以增聲勢聯絡互相策應該侍郎等總以權
衡緩急先幾應變力堵賊匪北竄句結是爲至要將此由六百里
加緊各諭令知之○諭據恩華面奏請帶直隸官兵等語著訥爾
經額於通永鎮標內挑選精兵五百名配齊軍裝器械派委得力
將弁迅速馳赴恩華軍營聽候調遣毋稍遲誤將此諭令知之○
命廣林畱京以恆春爲盛京工部侍郎由大理寺卿遷○丁酉琦善陳金
綬勝保奏揚城逆賊占踞月餘計在死守誘戰不出十六日晚間
臣琦善派總兵雙來進攻揚州北面陳金綬勝保派將弁兵丁攻
打西面均於四鼓各帶布囊並雲梯攔牌等物直趨城下臣琦善

復遣遊擊岳格馳赴蔣王廟一帶會同侍衛德興阿等於南面分
投埋伏防賊向儀徵西竄去後是夜雙來帶兵行至近城阮塹卽
令各兵用布囊裝土填塞立時越過直抵城下賊匪晝夜警備聞
我兵卒至卽用滾木擂石甌塊灰罐等物紛紛擲下城上槍礮排
列甚密我兵於城下仰攻不能得力僅將城上望樓轟毀一座臣
陳金綬臣勝保所派官兵攜帶攻城各具攻打西面亦係同時馳
抵城下賊匪面面嚴密設防遊擊岳格等探至南門外河干有賊
船七隻在彼停泊係該逆裝載糧石兵丁卽覓水過河將賊船焚
毀而臣等西北兩路攻城之兵自丑至申竭力攻打時已天晚撤
隊回營又據管帶西安馬隊官兵防堵儀徵縣之副都統常春及
知縣都榮森報稱十二日卯刻有賊船十一隻駛入儀徵縣沙漫
洲該副都統卽令該縣督率兵勇馳赴該處見賊船正近江岸卽

會同遊擊福明奮勇前進施放槍礮鉤住賊船三隻該逆紛紛落水仍令開槍擊斃賊匪七人槍傷二十餘人擒獲逆匪男婦十人十四日午時據報又有賊船數十隻或駛回江甯或駛至瓜州適遇暴風在老河影江面翻沈賊船兩隻溺斃賊匪數十人查六合儀徵兩處若再有續派官兵益資得力又奏

臣琦善前經札委閒

散旗人書義前往瓜州督同該處紳董辦理團練茲據該處紳董等稟稱書義督同紳董等購覓眼綫於十一日戌時潛入賊營乘隙縱火已將瓜州由牐北首賊匪所築土壘木臺概行焚毀十六日又經該處紳董率領兵勇鄉民萬餘人共往瓜州殺賊奪獲賊船傷賊多名並將越河地方賊築土城拆毀殆盡賊皆登舟亂竄或渡往鎮江或從由牐直上等語該處居民志切同仇深堪嘉尚見仍飭令嚴密防範毋稍鬆懈勝保又奏

臣查各省大礮皆爲賊

有足抗我兵非兵力厚集不能圍攻臣等各營除撥調外僅三千九百餘名統計臣琦善所帶僅六千餘名而揚城四面要隘甚多萬不能分兵布置遇有兵到各省紛紛截畱以致進剿兵單反不能剋期奏效臣愚以爲今日之勢兵貴合不貴分任在專不在眾見在各路雖有精兵然各有統屬分而不合不如專一責成以期得力南岸北岸責成統理襄辦各大員將續到各路重兵均歸統帶隨時調遣所有竄擾處所亦卽責令各員相機剿除則兵以合而見多事以專而能集否則徒分攻剿之力恐曠日持久無濟實功也 上諭內閣該處紳民志切同仇深堪嘉尚儻能始終出力殺賊立功著琦善等酌量保奏候朕施恩該逆疊次被剿勢漸窮蹙務當嚴飭帶兵各員同心勦力晝夜環攻迅復揚城無任北竄○諭軍機大臣等有人奏見竄滁州鳳陽之賊不過二三千人若

由滁州東路進兵或由白米山麓西南攻清流關或由珠龍橋攻
關之西北滁東之兵攻關之東南則關可復等語見在股賊雖未
占踞滁州而形勝之區不可不加意扼守著琦善等查明所奏各
情如有可採卽飭將弁率兵扼據險要趕緊進剿並知照周天爵
呂賢基李嘉端督兵夾擊迅殄賊氛前已降旨令琦善節制江北
各路官兵事權歸一如此次赴皖之兵尙嫌單弱卽著妥籌調遣
毋得稍有延緩原摺著鈔給閱看將此由六百里加緊諭知琦善
陳金綬勝保並諭慧成托明阿知之○諭湖北按察使江忠源親
歷行間戰功屢著前曾諭令馳赴江南幫辦軍務見在該署督等
委令順道剿辦廣濟縣匪徒儻此時尙未竣事卽著署提督阿勒
經阿接辦該署督等卽飭江忠源統帶兵勇迅速馳赴安徽鳳陽
一帶會同周天爵等攻剿該臬司係向榮軍營幫辦並可與向榮

聲息相通南北聯爲一氣此股匪徒不難剋期殄滅將此由六百里加緊諭知張亮基崇綸並傳諭江忠源知之○長蘆鹽政文謙奏端陽 萬壽貢品見赴蘇杭採辦尙未到京得旨所有本年端陽 萬壽各貢品均不必呈進俟採辦到津時卽作下次例貢亦不必補進並著內務府查明各處本年貢物有不克到京者著奏明統俟軍務完竣再行呈進亦不必補進○以派赴淮徐防堵賞杭州將軍瑞昌銀一百五十兩○戊戌諭內閣理藩院奏西林果勒盟長蘇尼特扎薩克郡王齊旺扎布等於本處應用馬匹見在一律備齊等語此項馬三千匹爲數不少若賞收則於該蒙古等不無耗費著理藩院轉飭扎薩克王貝勒貝子公台吉等所備交馬三千匹著卽停止以示體恤藩臣之至意○諭軍機大臣等本日據慧成奏浦口北竄賊船係金陵分股揚州瓜州京口之賊探

無動靜安知非潛蓄異謀別圖不逞當經諭令琦善等嚴行防範
矣向榮等圍攻金陵賊匪堅拒不出分股潛行渡江滋擾滁鳳一
帶意圖牽掣我軍賊情詭詐往往避實擊虛該大臣等務須隨時
偵察南北兩岸互相援應切勿顧此失彼據楊文定奏稱四月初
四日晚賊匪乘風順流燒放火船木筏我軍先設準備艇師各船
俱未損傷見又到夾板船二隻一俟風順卽圖進取等語見在江
面匪船來往自如必須趕緊設法轟擊水師各船最關緊要楊文
定見已拏問該大臣等務卽派委妥員管帶舟師水陸會合進剿
賊匪聲東擊西是其慣技尤應加意籌防偵探南北兩岸隨時知
照萬不可墮其術中至楊文定所奏收集江蘇各營潰兵此等敗
潰兵丁是否尙能得力著怡良飭令該管鎮將察其疲軟怯懦者
隨時裁汰另募充補兵歸實用斯餉不虛糜斷不可有名無實其

所請蘇州設立軍需總局之處著怡良等迅卽選派賢員擲節支應以重軍儲將此由六百里加緊各諭令知之○己亥賜孫如僅等二百二十二人進士及第出身有差○辛丑琦善陳金綬勝保奏二十日臣琦善親督官兵出隊向天甯門一面攻打陳金綬勝保督率官兵仍攻西門一帶與馮景尼同時並進槍礮環施計轟塌城垛十餘座斃匪不少午後已將天甯門旁城身洞穿數穴該逆不避礮火蠢擁齊至竇以厚木架以土石竭力抗拒並擲滾木插石瓢塊等物我兵竟不能近其城根是日陳金綬勝保攻城情形相同連日仍接續攻打以冀速殲羣醜但城堅賊詐防守甚嚴我兵終未得手必設法趕造攻城器具俾我兵遮護槍礮不至多傷方能奮力攻入俟臣等籌畫有成再行續報賊匪勢窮長髮賊多薙髮乘夜縋出城外意在窺我虛實鋌而走險又據臣琦善派

往瓜州之間散旗人書義會同瓜州等處紳士內閣中書鍾淮等
於十七日燒毀賊匪自鎮江運來火藥船隻續又搜獲賊十八名
並搜出西瓜礮刀槍各件二十日瓜州虹橋紳士等帶勇先與艇
船約會遇風一起卽與賊接仗是日適值東風該紳士等焚毀賊
船甚多艇船亦如約而至同時打沈船隻無數復放火將金山一
帶江面賊船焚毀儻能將江面賊船焚盡使該逆南北中阻卽易
爲力 上諭內閣該逆疊經懲創勢已窮蹙揚州郡城計日可復
著琦善陳金綬勝保會同慧成督飭鎮江兵勇合力環攻毋令賊
匪乘間竄逸○諭軍機大臣等周天爵呂賢基奏賊匪仍踞臨淮
關亟籌截擊一摺據稱宿州達鳳陽之路一由東南之固鎮驛一
由正南之蘄縣集兩路均屬緊要係派西安馬隊兵自固鎮一路
前進直擣臨淮北岸之賊又派固原兵由蘄縣一路前進直抵懷

遼鳳陽北岸出奇夾攻等語臨淮關爲南北要地該逆分股竄踞
意圖牽掣官軍乘此賊勢尙不甚大迅速截擊庶不至令其蔓延
尤須嚴防土匪勿令與匪黨暗相勾結其由懷遠蒙亳至歸德之
劉家口一路務須擇要固守仍隨時知照陸應穀一體防範刻下
各路官兵計已陸續到齊該侍郎等務卽督飭將弁兵勇等合力
攻剿迅殄賊氛無稍延緩至所請撥銀二十萬兩已交戶部速議
具奏兵餉緊急存銀有限自應再籌接濟徐州宿遷等處糧臺如
有暫可那用之款著鄭敦謹與陳啟邁等商酌先其所急無論多
寡撥解以應急需本日又諭李德於山東庫存各項內酌量接濟
矣將此由六百里加緊各諭令知之○諭逆匪分竄臨淮皖省情
形極爲喫重前據李德奏稱行抵東省各路官兵已催令前赴徐
州見在大兵雲集所需軍餉必須寬爲籌備徐州宿遷一帶設立

糧臺去山東較近所有各處應解軍餉恐一時不能運到設有貽誤所關非細著李德於藩庫正雜各項無論何款就近撥解務當移緩就急以期源源接濟諒該撫必能權其輕重妥速辦理也將此由五百里諭令知之○諭四川總督慧成奏駐守灣頭督兵會剿並陳揚州大兵不可分撤情形得旨所見甚是軍中變幻情形勝敗之機決於頃刻萬萬不可拘泥又奏謝准令伊子晉康幫辦軍務恩批原旨令晉康隨同辦理防剿事宜既可供驅使又可朝夕侍汝寶爲兩便非遽加幫辦之任也○周天爵呂賢基奏江蘇邳州銅山及山東嶧蘭等縣接壤處所有大股捻匪屢次滋擾宿遷縣舉人臧紆青於四月初八日探有捻匪四五百人在邳州所屬之李家集等處蟻聚肆搶該員卽帶勇三百餘名前往會同邳州知州焦肇瀛等協力剿捕斃捻首周恆修等二十餘名生擒三

十二名餘匪逃竄該員等率眾追剿十一日追至大同山該匪依山抗拒施放火槍勇目方達張振西等誘賊離山併力剿殺斃匪三十餘名殺死著名捻首柳漢漳生擒二十一名查邳宿捻匪大股雖經懲創而零星小股甚多猶恐湊集滋擾潁州蒙亳交界地方股數甚多尤爲鉅患見在粵匪北竄自當先其所急卽行迎剿俟鳳滁一帶肅清臣周天爵卽移兵前往剿辦報聞○壬寅諭內閣國家設官分職凡以爲民百姓之莠良繫乎州縣之賢否如果親民之官撫字催科廉能稱職自能爲民興利除弊消患未萌自逆匪滋事以來被擾地方慘遭荼毒卽毗連省分亦復徵兵調餉差務紛煩朕每念撫綏無術民困未蘇宵旰憂勤難安寢饋封疆大吏均有察吏安民之責應如何遴選賢能甄汰庸劣以期吏治民風蒸蒸日上乃近閱各省督撫章奏保舉勞績者多指參劣蹟

者少或被人彈劾降旨密查猶復曲意彌縫化大爲小卽如湖北廣濟縣知縣蔡潤琛若素洽輿情何至激成變故其他因斷獄不公苛派滋事者往往以一參了事旋請開復總由該管上司積習相沿因循莫振或思見好屬吏專事優容或因規避處分多方諱飾以致窮黎無所控訴奸匪藉以肆行比年粵楚地方養癰貽患皆由於此實堪痛恨若不大加整飭何以力挽頽風著各直省督撫嚴飭所屬時加訪察如有貪劣不肖州縣卽行據實奏參並將劣蹟指款嚴訊究辦無稍含混其闕茸無能者亦應隨時甄別毋任廢弛如有循聲素著者亦可臚陳實蹟登諸薦牘務使屬員知所勸懲民情日臻安謐庶不負朕恐懼修省孜孜求治之意將此通諭知之○癸卯諭內閣戶部奏代辦巡撫違例咨提別省銀兩一摺各省協撥軍餉向有定例卽使軍需緊急亦當一面奏聞一

面報部從無率行咨提之例前代辦江蘇巡撫倪良燿因庫款不足輒卽行文山西提解銀兩旣未奏明又未報部實屬有違定例倪良燿著交部嚴加議處其山西撥解銀兩業已動款卽著迅速解往軍營此外有無另向他省咨提銀兩之處著怡良許乃釗飭令倪良燿專案報部以憑查覈○諭向榮等奏請將隨營打仗得力之壯勇賞給銀米等語所奏向榮軍營見在各項壯勇著准其按照官兵給米之例按日一體發給以示體恤○向榮許乃釗奏臣等於紫金山進紮大營十八座均已一律移近城垣官兵聲勢聯絡卽於十七日夜飭令兵勇伏於城邊火箭百道射入城中繼以檜礮火罐噴筒一齊拋擲該逆卒不及防逆首楊秀青等率賊登城見朝陽門一帶城上之牌刀賊匪疑係官兵開礮轟斃數百人城中檜礮亂發人聲沸騰達旦始息十五日午刻鎮江逆匪千

餘人手執黃旗從東南兩門分出肆擾經提督鄧紹良派遊擊朱
占魁長桂各帶兵分中左右三路進攻已革副都統文藝亦督兵
攻打該逆開礮拒敵我兵奮勇直前衝入賊隊該逆敗退官兵追
近城圍殺斃長髮賊五名擊斃九名生擒一名餘皆敗走入城堅
閉不出總兵和春於十九日乘東北風起知會鄧紹良由陸路接
應並會商總兵葉常春副將李德麟等飭令各艇船於二十日黎
明起碇進剿和春等督飭各將弁由焦山至甘露寺並鎮城大馬
頭一帶賊船紛泊處所開礮轟擊水陸兩路之賊均開礮迎拒我
船順風三面攻剿擊壞賊船三四十隻燒毀賊船十餘隻並轟斃
陸路救應逆匪數十名乘勝追擊至瓜州口見仍寄碇焦山上游
扼賊下竄之路臣等仍審度形勢防剿兼施以圖攻克堅城又奏
查江甯各城處處可通東壩惟東南隅朝陽洪武通濟三門爲大

營所扼臣等原擬令總兵音德布帶兵三千駐紮板橋鳳臺門一帶以遏賊從西南兩面竄往之路惟因鎮江兵力尙單是以飭令該總兵統帶滇兵前往與提臣鄧紹良會辦克復事宜迄今板橋一路尙無官兵分布幸城南四十八社紳董練勇盤詰極嚴所有長髮逆黨裝扮僧道婦女逸出者皆被識破伏誅近時該逆又於城中雜髮扮作難民空手出城其紅黃頭巾旗幟號衣等物皆買通本地奸民代爲肩挑出城亦被各社查出立時處死查該犯襪底均有江甯分散東壩會齊八字作爲暗號臣等又詢之逃出難民皆言四月初旬城中賊匪揚言有僞西王統帶逆黨一千二百人陸續出城前赴東壩會齊之說嗣因先逸之賊爲村民究出殺斃甚多後逸者逃回城中不少約有六百餘人未敢出城是該逆竄擾東壩之法詭譎萬端臣向榮已飭委主事劉存厚同都司常

瑞帶領廣東兵六百名前往東壩駐紮適有前督臣陸建瀛調營

之候補道戚貞來至大營臣許乃釗卽令帶同江蘇舉人馬釗前

往高橋率同該處紳士選練丁壯皆用大營兵壯旗幟號衣以壯

聲勢一面飛咨督臣怡良在蘇派員添兵前往協同堵剿並又飛

咨浙江撫臣黃宗漢撥兵在湖州交界嚴密防堵臣又札催湖北

臬司江忠源迅速來營卽以所帶楚勇一千七百名駐紮鳳臺門

外以大營官兵一千數百名聲勢旣壯卽可於城西南隅遙爲聲

援上諭江南鎮江水陸各路賊匪疊受懲創勢已窮蹙該大臣

等大營已據要地鎮江剿匪亦疊次得手務當乘此聲威分飭諸

軍迅圖克復兩城仍當審度形勢扼要嚴防勿令賊匪乘閒竄越

其各社紳董練勇志切同仇深明大義甚屬可嘉著先行傳旨獎

勵仍飭令認真巡防毋稍疏懈指日大功告竣該大臣等一併論

功保奏候朕施恩傷亡兵勇著卽查明咨部議卹○諭軍機大臣等向榮許乃釗奏移營剿賊力圖克復及水陸獲勝並撥兵防堵東壩各摺片該大臣等移營進紮紫金山乘夜攻城首逆楊秀青等倉皇無措自相轟擊其鎮江水陸兩路亦經鄧紹良督率將弁和春統帶艇船約齊會剿殲擒賊匪多名擊壞及燒毀賊船數十隻是剿辦甚屬得手見在金陵大營十八座逼近城垣所調蘇州上海杭州等處三千斤及五千斤大礮想亦運到急宜乘勝進攻若先克復省城則鎮城收復勢如破竹江面賊船解散千餘艘若能一律散盡卽可斷賊往來並杜絕北竄之路惟賊船散去多隻係往何處是否駛赴上游抑係分泊北岸其船上有無賊匪潛藏偷越又圖他竄均須隨時偵探知照皖省江北水陸地方並上游湖北江西一體嚴防該逆被創窮蹙乘虛衝突是其慣技儻知孤

城不能久踞逆首等率其醜類併力潰圍而出渡江北竄皖省或由東壩直奔蘇常一帶我軍布置稍疏卽不免又墮奸計該大臣等務宜通籌熟計總期殄滅妖氛不留餘孽逆首洪秀泉楊秀青等見在圍困城中其僞西王亦未能逸出該逆等狀貌形迹必須採訪確實或能購綬內應於克復省城時全數擒獲不至令其免脫則掃蕩餘匪不難一鼓成功矣東壩一路經該大臣飭委主事劉存厚同都司常瑞帶領廣東兵六百名駐紮並委候補道戚貞等前赴高淳率同紳董練勇嚴行盤詰仍著怡良撥兵前往協同堵剿毋稍鬆懈逆黨改裝雜髮扮作難民詭詐多端尤須加意巡防近日揚州賊匪圍困技窮其分股竄擾滁鳳逼近徐州朕恐北路新到官兵未能深悉賊情已有旨諭令湖北臬司江忠源督帶楚勇一千七百名由廣濟縣馳赴江北會同截擊徐宿爲北方門

戶不能不先其所急諒該大臣等全局在胸必不至顧此失彼本日戶部奏向榮咨撥軍餉已由部改撥銀二十萬兩諒可迅速解赴糧臺並飭倪良燿將海運節省一款加緊提解補足三十萬二千兩之數以資接濟原片著鈔給閱看按款催提可也將此由六百里加緊諭知向榮怡良許乃釗並傳諭彭玉雯知之○免江蘇商米關稅○甲辰諭內閣前據怡良王懿德奏閩省緝匪情形請將地方官失察邪教處分暫予寬免當經降旨允准原爲因時制宜俾地方官各員不至心存瞻顧得以覈實辦理茲據吏部奏酌擬限期請明定章程一摺朕詳加披閱立法固貴變通除患尤期迅速儻地方官恃無處分於匪犯糾結滋擾之案相率因循則寬其既往轉致貽患將來必應明定期限以杜流弊著照所請卽自此次奉旨之日爲始定以一年爲限在一年限內查拏破案者如

有一犯經歷數縣一縣牽連數官其從前應得失察處分悉予寬免如仍前玩弛已逾一年之限者無論失察諱匿仍各照定例辦理以示限制並著該部通行各直省一體遵行○李嘉端奏逆賊自分擾滁州以後占踞臨淮關直趨鳳陽該署撫裕恭知縣黃元吉於四月二十一日酉刻在北門外九華山與賊接仗詎該逆另分一股從小路竄入東門城內煙火突起九華山與龍興寺兩股賊匪忽向北門奔去將鄉勇衝散盡擁闌入府城卽時失守查鳳部炮當衝要見旣失陷亟須擇要嚴防以遏該逆紛竄之路臣當飭部司海陞帶兵二百五十名協守定遠並令總兵王山知州金光飭扼守正陽關要口一俟援兵厚集卽當會商周天爵呂賢基等實力進攻迅圖規復上諭軍機大臣等寄諭欽差大臣都統銜琦善等本日據李嘉端奏鳳陽失守請催援兵一摺覽奏實堪

痛憾該省兵力甚單各路調往官兵一時未能趕到該大臣統制北路諸軍前派武慶開隆阿等帶兵二千赴援見在行抵何處西凌阿等所帶黑龍江馬隊經該大臣飭令追往滁州何以未聞接仗當此萬分喫緊之時豈可聽其逗遛著卽嚴飭星速遄行會同各路官兵合力剿辦斷不可稍涉延緩致誤事機揚州疊經獲勝如能及早克復則分擾之股匪其勢自衰該大臣等必能通籌熟計不至顧此失彼也將此由六百里加緊各諭令知之○諭李嘉端奏鳳陽失守一摺前據陸應穀奏善祿帶領官兵一千九百名於二十日內啟程赴皖本日又據托明阿奏於二十七日啟程帶兵徑赴泗州見復諭令該將軍提督迅速兼程前進計已到之西安馬隊及固原兵一千一百五十名並續到之陝甘兵當已不少周天爵諒亦由宿州督帶兵勇赴援著李嘉端迅卽會合各路援

兵併力進剿攻復郡城琦善所派黑龍江馬隊官兵前赴滁州皆
該撫兼咨迎提前進前經降旨令江忠源由廣濟帶領練勇赴皖
會剿但恐該臬司到皖較遲此時惟有會同見到各兵扼要攻剿
勿令該逆更竄他處李嘉端遵旨回奏一摺覽奏已悉其另片稱
已革知府胡元燁於廬州任內辦理團練得力曾經紳士聯名具
稟請畱等語當此軍務喫緊之時需人孔亟廬州逼近賊氛未便
驟易生手所有前參一案暫緩究辦卽著李嘉端嚴飭該員竭力
幫同守禦戴罪圖功其鳳陽城內文武各員下落及奎綬如何受
傷實情著卽查明據實具奏將此由六百里加緊各諭令知之○
諭本日托明阿奏帶兵直趨泗州並飛咨續調未到官兵一摺已
批令迅速進剿矣頃據李嘉端馳奏鳳陽於二十一日失守該撫
見駐護城驛專待各路援兵前來情形萬分緊急已諭令琦善等

並周天爵陸應穀各飭所調援兵星馳赴剿該將軍業經啟程沿途當已探悉著卽倍道前進相機進剿善祿由永城帶兵赴援周天爵由宿州前進諒可同時趕到合力進攻將此股逆匪迅速掃除毋任滋蔓將此由六百里加緊諭令知之○以鳳陽府城被賊竄陷革安徽巡撫李嘉端署布政使奎綬職均畱任○賞帶領黑龍江官兵齊齊哈爾副都統特爾卿額銀一百五十兩○是月貸山西永甯等五州縣歉收貧民倉穀並緩保德等十州縣應買節年平糶倉穀蠲緩湖南臨湘縣並茶陵等十八州縣被擾逋賦漕糧銀款